

Tuhun Nyoo Cha Tyaa San Marcos

Nu sacondutyá ra Juan chi ñáyiví ta cahán ra tuhun Nyoo chihin ñu

(Mt. 3.1-12; Lc. 3.1-9, 15-17; Jn. 1.19-28)

¹ Tyehe caa quichahá tuhun vaha ra Jesuscristo Sehe Nyoo.

² Ra Isaías profeta Nyoo tyaa ra tuhun ra Cristo ta tuhun ra Juan. Tyehe caa catyí Nyoo chi ra Cristo:

Cumañi ca cuhun siqui ñuhu ñayiví ta cutachi chi noo ra cusacoto chi ñáyiví vatyí nyaá cuhun nu nyicú ñu, catyí Nyoo chi ra Cristo.

³ Chiñi yo ndusu noo ra cha canachaá nu chiqui ndi,

ta catyí ra: “Tari sanduvahá ndo noo ityi, tyicuan caa sanduvaha ndo aña ndo vatyí cua quichi Sutu Mañi yo.

Nuña ndo noo ityi ndoo chi ra na quihvi ra aña ndo.”

Tyicuan caa tyaa ra profeta Isaías nu tutu Nyoo ta cha naha.

⁴ Ta tyicuan caa quichi ra Juan sacondutyá ra chi ñáyiví nu chiqui ndi cuan. Ta catyí ra chi ñu na ndu uvi iñi ñu cuatyí ñu, ta na condutyá ñu tari noo seña tyi nasama ñu cuhva iyó ñu, ta tyicuan caa ta Nyoo cusaha ra ticahnu iñi cuatyí ñu.

⁵ Ta tandihí ñáyiví ityi Judea quichi coyo ñu tyasoho ñu tuhun cahán ra, ta ñu ñuu Jerusalén

ñandihí. Ta cha yaha nahma ñu cuatyí ñu, sacondutyá ra Juan chi ñu yuvi cahnu Jordán.

⁶ Ta sahma cha ñihno ra Juan cuan chihin ixi camellu chino chi. Ta ñi# cuví sinchu ra. Ta pinchi tuhvá ra chachí. Ta tyañuñu cuhu tuhvá ra chihí.

⁷ Ta cahán ra tuhun Nyoo ta catyí ra:

—Cha yaha yuhu ta vachi noo ra iyó xaan ca tunyee iñi chi ican saha yuhu. Ta ña nañé ni cha ndachi ñi# xityin ndichan ra.

⁸ Yuhu sacondutyé chi ndo chihin ndutyá. Soco maa ra cusacondutyá ra chi ndo chihin Tatyí Ii Nyoo —catyí ra Juan.

Nu condutyá ra Jesús (Mt. 3.13-17; Lc. 3.21-22)

⁹ Quiví cuan quita ra Jesús ñuu Nazaret, cha nyaá ityi Galilea, ta cuahan ra nya yuvi cahnu Jordán. Ta yucuan sacondutyá ra Juan chi ra.

¹⁰ Ta cha yaha condutyá ra Jesús, ta cuhva cha cua quita ra chichi ndutyá, ta nanyehe ra andiví cuahan nuña. Ta nyehe ra Tatyí Ii Nyoo tari noo paloma, vachi noó siquí ra.

¹¹ Ta tyacú noo ndusu ityi andiví ta catyí ndusu cuan tyehe caa:

—Yoho cuvún Sehi ta cuñí xain chuun. Ta si# xaan cuñí chuhun —catyí ndusu cuan.

Nu nducú nyehe ra ña vaha chi ra Jesús (Mt. 4.1-11; Lc. 4.1-13)

¹² Yaha cuan ta sacuhun Tatyí Ii Nyoo chi ra Jesús noo nu chiqui ndi#.

¹³ Ta yucuan chinyaá ra uvi xico quiví nu chiqui ndi# cuan, nu yori ñáyiví iyó, maa ri quití

iyó. Ta nducu nyehe cuihna chi ra. Ta yahau cuan ta chaa coyo ángel ta catyiñuhu ra chi ra.

*Nu quichaha saha tyiño ra Jesús ityi Galilea
(Mt. 4.12-17; Lc. 4.14-15)*

¹⁴ Cha yahau catyihi ñu chi ra Juan vehe caa, ta ra Jesús cuanuhu ra Galilea ta cahán ra tuhun vaha Nyoo chihin ñáyivi.

¹⁵ Ta catyí ra:

—Cha chaa cuhva cha cua cunyaca ñaha Nyoo añama ndo. Yatyin ri nyaá ra chihin ndo. Nduu uvi iñi ndo cuatyí ndo, ta chino iñi ndo tuhun Nyoo cha sacacu añama ndo —catyí ra Jesús.

*Nu cana ra Jesús chi cumi tahan ra catiñ tiyaca
(Mt. 4.18-22; Lc. 5.1-11)*

¹⁶ Chicá noo ra Jesús yuhu miñi cha nañi Tyañuhu Galilea. Ta nanyehe ra chi ra Simón ta chi yañi ra, ra Andrés, cacañi ra yuhva ra nu ndutya, vatyí ra catiñ tiyaca cacuví ra.

¹⁷ Ta catyí ra Jesús chi ra:

—Cunyicon ndo chii, ta yuhu cusacuvi vatyí tari ñihí ndo tiyaca, tyicuan caa cuñihi ndo añama ñáyivi, tava ndo chi ñu nu quiñi caa, na quihvi ñu cuenda Nyoo —catyí ra Jesús chi ra Simón ta chi ra Andrés cuan.

¹⁸ Caa cuhva ri cuan casandoo ra yuhva ra, ta cuahan coyo ra chihin ra.

¹⁹ Yahau cuan ta chiin ri ca chica ra Jesús, ta nanyehe ra chi ra Jacobo, sehe ra Zebedeo, ta chi yañi ra, ra Juan. Cañohó ra chichi noo canoa canaquicú ra yuhva ra.

²⁰ Cana ra Jesús chi ra. Ta ninduvi tahan ra casandoo ra sutu ra, ra Zebedeo, chichi canoa

chihin ra catyinyeé chi ra. Ta cuahan coyo ra chihin ra Jesús.

*Nu nduvahā noo ra yihí tatyí ña vaha añima
(Lc. 4.31-37)*

²¹ Ta chaā coyo ra ñuu Capernaum. Ta cuví chi noo quiví nyitatú ñáyiví, ta quihví ra Jesús chichi vehe ñuhu, ta quichahā sañaha ra tuhun Nyoo chi ñáyiví.

²² Ta iyo cuñí ñu tuhun cahán ra, vatyí sañahá ra tari noo ra iyó vaha ityi chii cha cahán. Ña cahán ra cuhva cahán ra casacuahá cuenda ley vehe ñuhu.

²³ Chichi vehe ñuhu cuan ñohó noo ra yihí tatyí ña vaha añima. Ta canā chaa ra ta catyí ra:

²⁴ —¿Ñáá tuhun cha tyihún chuun chihin ndi, yoho Jesús ra ñuu Nazaret? ¿Atu vachun vatyí sanaun chi ndi? Yuhu ñohó nui chuun, ta chité vatyí Sehe Ii Nyoo cuví chuun —catyí ra yihí tatyí ña vaha cuan chi ra Jesús.

²⁵ Nacahan ra Jesús ta catyí ra chi tatyí ña vaha cuan:

—¡Taxi ri! ¡Saña chi ra ndahvi chiña! —catyí ra.

²⁶ Ta tatyí ña vaha cuan, chihí tañi ra cuhví cuan sahá chi, ta iyo canachaa tatyí cuan quitā chi ra.

²⁷ Tandihí ñáyiví yuhvi xaan ñu cuví, ta candaca tuhun ñu chi tahan ñu, ta catyí ñu:

—¿Ñáá cha cuví ihya? ¿Ñana vaha tuhun chaa sañahá ra ihya? ¡Vatyí iyo vaha tunyee iñi chi ra, nyacua nya tatyí ña vaha, ta quichahá chi ra!
—catyí ñu.

28 Ta numi ri cachito ñáyiví tandihí ñuu cha iyó Galilea cuan tuhun ra Jesús.

Nu sanduvahá ra Jesús chi maha tyiso ra Simón Pedro
(Mt. 8.14-15; Lc. 4.38-39)

29 Cuhva cha quitá coyo ra chichi vehe ñuhu, ta cuahan ra Jesús vehe ra Simón ta ra Andrés. Ta cuahan tucu ra Jacobo ta ra Juan chihin ra.

30 Ta maha tyiso ra Simón catuví ña nu chito, cuhví ña chihin cahñi. Ta catyí ñu chi ra Jesús tyi cuhví ña.

31 Tyicuan ta tuhvá ra Jesús, ta tñn ra ndaha ña. Ta nacoñehe ra chi ña. Ta caa cuhva ri cuan, tinyaa cahñi chi ña. Ta quichaha tyiñuhu ña chi ra.

Nu sanduvahá ra Jesús chi cuaha ñu cuhví
(Mt. 8.16-17; Lc. 4.40-41)

32 Cuhva cha quee ñanyii ta cha cua caa, quichi nyaca ñu tandihí ñu cuhví ta ñu yihí tatyí ña vaha nu nyaá ra Jesús.

33 Ta tandihí ñáyiví ñuu cuan candu ñn ri ñu yuvehe cuan.

34 Ta cuaha ñu cuhví cha sñn sñn cuehe sanduvahá ra. Ta tavá ñehe ra chi cuaha tatyí ña vaha, soco ña chahá ra cha cahan tatyí cuan, vatyí chitó cuan yóó ra cuví ra.

Nu cahán ra Jesús tuhun Nyoo ityi Galilea
(Lc. 4.42-44)

35 Ta cha inga quiví cuhva cha ni ñaa ca, ndicuitá ra Jesús, ta cuahan ra ityi chata ñuu. Cuahan ra noo nu yori sayanga chi ra cua cacan tahvi ra chi Nyoo.

³⁶ Ta ra Simón ta ra tahan ra cuahan coyo ra cua nanducu ra chi ra.

³⁷ Ta cuhva cha canañih_i ra chi ra cacatyí ra chi ra:

—Tandih_i ñáyiv_i nanducú ñu chuun —cacatyí ra chi ra Jesús.

³⁸ Soco maa ra catyí ra chi ra:

—Coho ndo inga ñuu cha nyicú yatyin ri ihya, vatyí cahan tiquí tuhun Nyoo yucuan, vatyí yucuan tyiño vachi —catyí ra Jesús chi ra.

³⁹ Yucuan chaha chicá noo ra Jesús tandih_i ri ñuu cha iyó Galilea, cahán ra tuhun Nyoo chichi vehe ñuhu tahan tahan ñuu. Ta tava ñehe ra tatyí ña vaha cha yih_i aña ñáyiv_i.

Nu sanduvahá ra Jesús chi noo ra cha tyahyu coño (Mt. 8.1-4; Lc. 5.12-16)

⁴⁰ Noo chaha tuhva noo ra cuhví cha tyahyu coño nu nyaá ra Jesús. Ta chicuiñ_i chit_i ra nuu ra, ta catyí ra chi ra:

—Tatu cuñún, cuví sanduvahun chii —catyí ra.

⁴¹ Ta cundahvi cuñí ra Jesús nyehé ra chi ra, ta tyiso ra ndaha ra siquí ra, ta catyí ra:

—Cuñí sanduvahí chuun. Ta na nduvahun vityin ri —catyí ra chi ra.

⁴² Caa cuhva ri cha catyí ra tyehe caa, tinyaa cuehe cuan chi ra, ta nduvahá ra.

⁴³ Tyicuan ta catyí ra Jesús vatyí cha cuvi cuhun ra, soco catyí xaan ra chi ra na sacuvi ra tyehe caa:

⁴⁴ —Nyehé. Yori chihin cahun tuhun. Soco cuahan nu nyaá tata sutu. Ta sañahun chuun chi ra, ta cuhvon cha tahán chi cuhvon na ndundiun nu Nyoo tari cuhva catyí nu ley cha tyaá ra

Moisés, vatyí tacuhva coto tandihí ñáyiví tyi chanduvahun chihin cuehe cuan —catyí ra Jesús chi ra.

⁴⁵ Soco ra cuan chahan ra, ta quichaha nacatyí ra chi tandihí ñáyiví. Yucuan chaha ña cuví ca quihví ndichin ra Jesús chichi ni noo ñuu. Ta ityi chata ri ñuu chicá noo ra nu yori ñáyiví iyó, soto tandihí ri ityi quita coyo ñu, quichí nyehe ñu chi ra.

2

Nu sanduvaha ra Jesús chi noo ra cuhví cha ña cuví nacanda
(Mt. 9.1-8; Lc. 5.17-26)

¹ Suhva quiví yaha ta quihví ra Jesús inga chaha chichi ñuu Capernaum. Ta cachito ñáyiví tyi nyaá ra vehe.

² Ta numi ri candu ñin ri cuaha ñáyiví. Ta nyacua ña chitahan ñu, ni yuvehe. Ta maa ra Jesús cahan ra tuhun Nyoo chihin ñu.

³ Tyicuan ta cumi tahan ra canyisó chi noo ra cuhví cha ña cuví nacanda, caquichí nyaca ra chi ra nu nyaá ra Jesús.

⁴ Soco ña cuví caquihví ra nya nu nyaá ra Jesús cha cuenda vatyí tuví xaan ñáyiví. Tyicuan ta candaa ra ityi xiñi vehe. Ta sacuachiyó ra suhva tyiyo. Ta sanoo ra chi ra cuhví cuan chihin chito.

⁵ Nyehe ra Jesús vatyí cachinó xaan iñi ra cuan. Ta catyí ra chi ra cuhví cuan:

—Cha ndachí cuatyun, suti —catyí ra Jesús chi ra.

⁶ Soco suhva ra sacuahá cuenda ley vehe ñuhu nyicú ra cuan, ta cachicá xiñi ra tyehe caa:

⁷ “¿Ñáá tuhun cha cañá iñi ra ihya cahan ra tyehe caa? Chicoo cuatyi ra nuu Nyoo chihin tuhun cahan ra vatyí yori cuví sandachi cuatyi, noo tuhun ri maa Nyoo cuví sandachi ra cuatyi”, cachicá xiñi ra.

⁸ Soco ra Jesús chitó ra cha cachicá xiñi ra. Ta catyi ra chi ra:

—¿Ñáá tuhun cha chicá xiñi nyoho tyicuan caa?

⁹ ¿Ñáá cha yñi ca, cha catyi yo chi ra cuhví ihya vatyí cuatyi ra cha yahá ndachi, o cha catyi yo chi ra vatyí nducuita ra ta naquehen ra chito ra ta caca ra?

¹⁰ Vaha, vityin chihin cha sanduvahi chi ra ihya, cusañahi chi ndo vatyí yuhu ra cuví Rayñi cha quichí nya gloria, iyó ityi chii cha sandachi cuatyi ñáyivi —catyi ra Jesús chi ra.

Tyicuan ta quichaha catyi ra chi ra cuhví cuan:

¹¹ —Catiyí chi yoho, ndicuita, naquehen chiton, ta cuanuhu nya vehun —catyi ra Jesús chi ra.

¹² Ta ra cuhví cuan ndicuita ra. Naquehen ra chito ra, ta cuanuhu ra. Ta tandihí ñu nyehe ñu, ta iyo cuñí ñu, ta sacahnú ñu chi Nyoo, ta catyi ñu:

—Ni noo chaha ta nyehe ca yo cha tyehe caa —catyi ñu.

Nu cana ra Jesús chi ra Leví (Mt. 9.9-13; Lc. 5.27-32)

¹³ Yahá cuan ta cuahan tucu ra Jesús inga chaha yuhu miñi cuan. Ta cuhva cha nataca ñáyivi nu nyaá ra, quichaha cahan ra nuu ñu.

¹⁴ Tyicuan ta cuahan ra ta nu yahá ra nanyehe ra chi ra Leví sehe ra Alfeo, nyaá ra nu sahá tyiño

ra, tavá ra xuhun cuenda gobiernu ñuu Roma. Ta catyí ra Jesús chi ra:

—Coho chihin.

Tyicuan ta nducuita ra Leví, ta cuahan ra chihin ra.

¹⁵ Yaha cuan ta taha chi nyaá ra Jesús chihin ra cachicá noo chihin ra cachachí ra nu mesa vehe ra Leví. Ta nyicú tucu cuaha ra catavá xuhun chihin inga ñáyivi iyó cuatyí. Vatyí cuaha xaan ñu nyicón chi ra.

¹⁶ Soco ra casacuahá cuenda ley vehe ñuhu, ta ra cacuví fariseo, ra cha quichahá xaan ley vehe ñuhu, cha canyehę ra vatyí chachí ra Jesús chihin ra catavá xuhun, ta ñu iyó cuatyí, ta cacatyí ra chi ra cachicá noo chihin ra Jesús:

—¿Yoso caa cha ra sacuaha chi nyoho chachí ra ta chihí ra chihin ra catavá xuhun ta ñu iyó cuatyí?

¹⁷ Chiñi ra Jesús cha cacahan ra ta catyí ra:

—Ña chiñuhú doctor chi ñu ña cuhví, soco chiñuhú ra chi ñu cuhví. Vachi yuhu soco ñima cha cuenda cha vaha chi ñu vaha, soco cha cuenda cha vaha chi ñu iyó cuatyí —catyí ra Jesús chi ra.

Nu sañahá ra Jesús vatyí nya cha yaha canyaha ra chi ñu nyicón chi ra, tyicuan ta cutahan chi savaha ñu ayuno

(Mt. 9.14-15; Lc. 5.33-35)

¹⁸ Noo chaha, ra canyicón chi ra Juan ta ra canyicón chi ra fariseo, ña chachí ra ta nanducú ra chi Nyoo. Ta suhva ñáyivi quichí coyo ñu nu nyaá ra Jesús, ta ndaca tuhun ñu chi ra, ta catyí ñu chi ra:

—¿Ñáá tuhun cha ra canyicón chi ra Juan ta ra canyicón chi ra fariseo tuhvá ra savaha ra ayuno, ta ra cachicá noo chuhun ña tuhvá ra? —catyí ñu.

¹⁹ Ta nacahan ra Jesús ta catyí ra:

—Noo vico tandaha, ¿atu cuví cha ma cachi ra ñohó vico cha ni ri ca cha nyaá ra cha cua tandaha cuan chihin ra? Tatu nyaá ca ra cua tandaha cuan chihin ra, ma cuví cha ma cachi ra.

²⁰ Soco vachi chi quiví cha cutinyaa ra chi ra tandaha cuan nu nyicú ra tahan ra. Yucuan ndicha quiví coo cuhva cha ma cachi ra ta nanducu ra chi Nyoo —catyí ra Jesús chi ñu.

Nu sañahá ra Jesús vatyi ña nacachi tahan tuhun chahnu cha iyó ñáyiví chihin tuhun chaa cha sañahá ra

(Mt. 9.16-17; Lc. 5.36-39)

²¹ Catyí ra Jesús:

—Yori naquicu noo sahma chahnu chihin noo sahma chaa, vatyi cha chaa cuan nandiyí ta cahnya chi sahma chahnu, ta nu tahnya cuan cunducahnu ca.

²² Ta ni ri ña tuhvá yo tyihi yo vinu chaa chichi ñii chahnu, vatyi vinu chaa chahnyá chi ñii, ta chati vinu, ta tiví ñii. Yucuan chaha cuñí chi cha tyihi yo vinu chaa chichi ñii chaa —catyí ra Jesús.

Nu catohon ra cachicá noo chihin ra Jesús yoco trigu quiví nyitatu ñáyiví

(Mt. 12.1-8; Lc. 6.1-5)

²³ Noo quiví cha tuhvá ñáyiví nyitatu, cuahan ra Jesús chicá ra mahñu nu iyó cha tachí ñáyiví. Ta ra cachicá noo chihin ra quichaha catohon ra yoco trigo cuan cuhva cha yahá coyo ra.

²⁴ Tyicuan ta quichaha cacatyí ra fariseo chi ra Jesús:

—¡Nyehe xihna! ¿Ñáá tuhun cha sacuví ra cachicá noo chuhun tyiño cha ña tahán chi sacuvi yo quiví nyitatú yo? —cacatyí ra.

²⁵ Soco maa ra Jesús catyí ra chi ra:

—¿Atu ni noo chaha ta sacuaha ca nyoho cha sacuvi ra David chihin ra tahan ra noo quiví cha cachisoco vavaha ra?

²⁶ Quiví cha cuví ra Abiatar tyiño cha cuví ra nuu chi tata sutu, quihví ra David chichi vehe Nyoo. Ta chachí ra pan ii, cha tahán chi cachi maa ri maa ra cuví sutu. Ta chaha tucu ra cachi ra ndihí chihin ra —catyí ra Jesús.

²⁷ Ta catyí tucu ra Jesús chi ra:

—Chicoo quiví nyitatú yo, cuenda cha vaha chi ñáyiví, soco ñáyiví ña chicoo ñu cha cuenda cha vaha chi quiví nyitatu yo.

²⁸ Yucuan chaha yuhu Rayíi cha quichí nya gloria, iyó ityi chíi cha catyi chi noo noo ndo ñáá cha sacuvi ndo quiví nyitatú yo —catyí ra Jesús.

3

Nu nduvaha noo ra na ityi inchiyo ndaha
(Mt. 12.9-14; Lc. 6.6-11)

¹ Quihví ra Jesús inga chaha chichi noo vehe ñuhu. Ta yucuan nyaá noo ra na ityi inchiyo ndaha.

² Ta cañañí ra fariseo chi ra Jesús nyehé ra tatu sanduvaha ra chi ra quiví nyitatú ñu, vatyí tacuhva coo cuatyí tyaa ra siquí ra.

³ Tyicuan ta ra Jesús catyí ra chi ra na ityi ndaha cuan:

—Nd̄icuita ta cuinanyaa mahñu ihya.

⁴Yah̄a cuan ta ndacā tuhun ra chi inga ñu cha tayucú cuan, ta catyí ra:

—¿Ñáá cha tahán chi sacuvi yo quiv̄i nyitatu yo? ¿Atu sacuví yo cha vaha o cha ña vaha? ¿Atu tahán chi sanduvaha yo ñáyiv̄i o cha cahñi yo?

—catyí ra Jesús.

Tyicuan ta taxi taxi maa candoḡ ñu cuan.

⁵Tyicuan ta xaan nanyehe ra Jesús chi ñu, ta cuihya cuñí ra vatyí ña cuñí ñu cutuñi iñi ñu. Ta catyí ra chi ra cuan:

—Sanacaa ndahun.

Ta sanacaa ra, ta nduvahaḡ ndaha ra.

⁶Tyicuan ta quit̄a coyo ra fariseo, ta quichahaḡ catyih̄i tahan ra tuhun chihin ra cuenda ra Herodes, yoso caa cacahñi ra chi ra Jesús.

Nu nyicú cuaha ñáyiv̄i yuhu miñi

⁷Soco ra Jesús cuahan ra chihin ra cachicá noo chihin ra yuhu miñi, ta cuaha ñáyiv̄i ityi Galilea canyicón chi ra.

⁸Ta cha chitō ñáyiv̄i tuhun nahnu cha sacuví ra, cuaha xaan ñu quich̄i coyo ñu ñuu Jerusalén ta inga ñuu cha iyó ityi Judea, ta ñuu cha iyó Idumea, ta inga chiyo yuvi cahnu Jordán, ta ñuu Tiro ta ñuu Sidón ñandih̄i, vatyí cuñí ñu nyehe ñu chi ra.

⁹Yucuan chaha catyí ra Jesús chi ra cachicá noo chihin ra na casanduvaha ra noo canoa, tacuhva vatyí tatu ndutih̄in xaan chihin ñáyiv̄i, cuví quih̄vi ra chichi canoa cuan.

¹⁰Vatyí cuaha xaan ñu cha yah̄a sanduvahaḡ ra, ta yucuan chaha tandih̄i ñu cuhv̄i cuahan ñu nu

nyaá ra vatyi cuñí ñu t̄in ñu chi ra tacuhva nduvaha ñu.

¹¹ Ta ñu yihí tatyí ña vaha añima, chicuiñi chiti ri ñu nuu ra, ta canachaa tatyí ña vaha cuan, ta catyí chi tyehe caa:

—¡Yoho cuvún Sehe Nyoo!

¹² Soco ra Jesús chasi ra yuhu tatyí cuan vatyi ma catyí ca chi yóó ra cuví ra.

Nu nacachi ra Jesús chi uchi uvi apóstol vatyi cacaca ra tyiño ra (Mt. 10.1-4; Lc. 6.12-16)

¹³ Yahā cuan ta ndaa ra Jesús noo yucu ta cana ra chi ra cuñí maa ra nacachi ra. Ta quichi coyo ra nu nyaá ra.

¹⁴ Ta tyiso ra chi uchi uvi tahan ra vatyi cundihi ra chihin ra, ta vatyi tyatyíño ra chi ra na cucahan ra tuhun Nyoo.

¹⁵ Ta chahā ra ityi chi ra vatyi sanduvaha ra chi ñu cuhví, ta tava ñehe ra chi tatyí ña vaha.

¹⁶ Ta ican ra ihya cacuví ndi uchi uvi tahan ra: ra Simón cha sacunañi ra Jesús Pedro chi;

¹⁷ ra Jacobo ta yañi ra ra Juan, sehe ra Zebedeo. Ta Boanerges sacunañi ra chi ninduvi tahan ra ta cuñí chi catyi: ra ñihi cahán tari cahán savi,

¹⁸ ra Andrés, ra Felipe, ra Bartolomé, ra Mateo, ra Tomás, ra Jacobo sehe ra Alfeo, ra Tadeo, ta inga ra Simón cha yihí cuenda ityi ra cuñí cuhun cuatyí siqui gobiernu ñuu Roma cha nyacá ñaha chi ñu,

¹⁹ ta ra Judas Iscariote, ra cha naxico tuhun chi ra Jesús.

*Nu tyaá ñáyiví cuatyí siqui ra Jesús, ta catyí ñu vatyí tunyee ñi cuihna iyó chí ra
(Mt. 12.22-32; Lc. 11.14-23; 12.10)*

Yaha cuan ta quihví ra Jesús noo vehe chihin ra cachicá noo chihin ra.

²⁰ Ta inga chaha natacā cuaha ñáyiví, ta nyacua ni ña cuví ca cachi ra.

²¹ Cha cachitō ñáyiví chi ra Jesús vatyí nyaá ra yucuan, quichí coyo ñu vatyí cunuhun ra chihin ñu, vatyí catyí ñáyiví chi ñu tyi nduloco ra.

²² Ta suhva ra casacuahá cuenda ley vehe ñuhu Jerusalén cha quichí coyo suri tyicuan caa cacatyí ra:

—Ra ihya, ra Beelzebú ra cuví nuu chi cuihna yihí chi ra. Ta chihin tunyee ñi cuihna tava ñehe ra tatyí ña vaha —cacatyí ra.

²³ Tyicuan ta canā ra Jesús chi ra, ta catyí ra chi ra:

—¿Yoso caa, atu tavá ñehe cuihna suri chi ra tahan maa ra? Ma sacuvi cuihna tyicuan caa.

²⁴ Tatu noo gobiernu cacusiin ra, ta cacañí tahan ra chihin tahan ra, gobiernu cuan ña naha cuacunyaca ñaha ra.

²⁵ O tatu ñáyiví noo vehe, ña in ri cuví ñu chihin tahan ñu ta cañi tahan ñu, cutiví nu nyicú ñu.

²⁶ Ta tatu cuihna cacusiin ra ta canducuita ra siqui tahan ra, ¿yoso caa cucuvi chí ra? Cundihi tuhun ra.

²⁷ Yori cuví quihví chichi vehe noo ra ñihi tari cuihna ta tinyaa ra cha chii ra, tatu ma cuhñi xihna ra chí ra. Yucuan ndicha ta cuví tinyaa yo cha chii ra.

28 'Cha ndicha catyí chi ndo vatyi cuví coo tìcahnu iñi tandihì nuu cuatyí ñáyivi, ta tandihì cha quiñi caa cha cahán ñu.

29 Soco ñu cahán ña vaha siqui Tatyí Ii Nyoo, ma cuví maa coo tìcahnu iñi cuenda cuan, soco tyicuan ri maa coo cuatyí ñu —catyí ra Jesús.

30 Tyicuan caa catyí ra Jesús chi ra casacuahá cuenda ley vehe ñuhu, vatyi maa ra cacatyí ra vatyi ñohó noo tatyí ña vaha chi ra.

*Yóo ñu cuví sihi ra Jesús ta yañi ra
(Mt. 12.46-50; Lc. 8.19-21)*

31 Tyicuan ta chaq coyo sihi ra Jesús ta yañi ra, soco ndoo ñu ityi chata vehe, ta tachì ñu cucana chi ra.

32 Ta ra nyicú nicachico nu nyaá ra Jesús cacatyí ra chi ra:

—Sihun ta yañun ta cuhvon nyicú ñu ityi chata vehe, ta nanducú ñu chuun —catyí ra chi ra.

33 Soco maa ra catyí ra:

—¿Yóo ñu cuví sihi ta yañi? —catyí ra.

34 Tyicuan ta nanyehe ra chi ñu nyicú nicachico, ta catyí ra:

—Ican ñu ihya cuví sihi ta yañi.

35 Vatyi savahri ñu sacuví cuhva cuñí Nyoo, ican ñu cuan cuví yañi, ta cuhve, ta sihi —catyí ra Jesús.

4

*Tari noo ra chicá noo tachí, tyicuan caa cuví ra
cahán tuhun Nyoo
(Mt. 13.1-9; Lc. 8.4-8)*

¹ Inga chaha quichaha sañaha ra Jesús yuhu miñi, ta ndu ñn ri cuaha ñáyivi nu nyaá ra. Yucuan chaha quihvi ra chichi noo canoa cha tacaá nu ndutya yuhu miñi cuan. Ta chicunyaá ra, ta tandihi ñáyivi ndoo ñu nu ñiti.

² Tyicuan ta cuaha cha sañaha ra chi ñu chihin cuhva ri. Ta nu sañahá ra chi ñu, ta catyí ra chi ñu:

³ —Tyasoho ndo tuhun ihya. Minoo ra quitá ra vehe ra, cuahan ra nu iyó tyiño sahá ra. Ta quichaha quití ra chiti trigu nu ñuhú ra.

⁴ Ta ityi cuahan ra quití ra, suhva chiti cuan canacoyo yuhu ityi, ta quichí coyo saa ta cachachí ti.

⁵ Suhva ca chiti canacoyo ticu yuu nu ña cuaha ñuhú yihí. Ta chiti cuan numi ri caña, vatyí ña cono xaan yihí ñuhú cuan.

⁶ Soco cuhva cha caña ñanyii, na ityi chi vatyí ña cono yihí yoho chi.

⁷ Ta suhva ca chiti canacoyo chichi tu iñu. Ta chahnú tu iñu cuan, ta chasí tun nuu trigo cuan. Yucuan chaha ña chiyo chiti tun.

⁸ Soco suhva chiti cha canacoyo nu ñuhú vaha. Ta caña ta chahnú. Ta vaha chahá tun chiti. Suhva tun chahá tun oco uchi chiti cha noo noo tun. Inga tun chaha tun uñi xico chiti. Ta inga tun chahá ciento chiti —catyí ra Jesús chi ñu.

⁹ Ta catyí tucu ra chi ñu:

—Tatu cutuñi iñi ndo, tyasoho ndo tuhun cahín.

*Nu sacotó ra Jesús ñáá cuenda sañahá ra chihin cuhva ri chi ñáyivi
(Mt. 13.10-17; Lc. 8.9-10)*

¹⁰ Yahā cuan ta ndoo maa ri maa ra Jesús chihin ñu nyicón chi ra ta ndi uchi uvi tahan ra chicá noo chihin ra. Ta candacā tuhun ñu chi ra ñáá cha cuñi chi catyi tuhun cuan.

¹¹ Ta catyi ra chi ñu:

—Chi nyoho sacotó Nyoo tuhun xehe yoso caa nyacá ñaha ra añima ñáyivi. Soco chi ñu cha ña chinó iñi chi ra, maa maa ri chihin cuhva ri sañahí chi ñu.

¹² Vatyí tatu nyehé ñu soco cuví chi tari cha ña nyehé ñu, ta tatu chiñi ñu soco ma cutuñi iñi ñu. Tacuhva cha ma nasama ñu cuhva iyó ñu ta ni ma coo ticahnu iñi cuatyí ñu —catyi ra Jesús chi ñu.

Nu chahā ra Jesús cuenda yoso caa cuahan tuhun ra tachí chiti cuan
(Mt. 13.18-23; Lc. 8.11-15)

¹³ Ta catyi tucu ra chi ñu:

—¿Atu ña cutuñi iñi nyoho tuhun ihya? Tatu tyicuan caa ña cutuñi iñi ndo, ¿yoso caa cuví cutuñi ini ndo tandihí inga tuhun sañahí chi ndo?

¹⁴ Ra cha tachí chiti trigu cuan cuví ra tari noo ra cahán tuhun Nyoo.

¹⁵ Yihí ñáyivi cuví ñu tari nu canacoyo chiti yuhu ityi: chiñi ñu tuhun Nyoo, soco cha yaha chiñi ñu, quichi cuihna ta tinyaa ra tuhun Nyoo cha tachí ra añima ñu.

¹⁶ Inga ñáyivi cuví ñu tari nu canacoyo chiti ticu yuu: chiñi ñu tuhun Nyoo ta siñi cuñi ñu natin cuenda ñu noo ri cuhva.

¹⁷ Vatyí nu cañā chiti ticu yuu cuan, chiin ri ñuhú yihí chaha, yucuan chaha cañā soco ña cuví tyihi yoho vaha chi. Ta tyicuan caa ñu cuan, suhva ri quivi chino iñi ñu. Soco quivi vachi

tindoho siqui ñu, o satasi iñi ñáyivi chi ñu cha cuenda tuhun Nyoo, sandihi ri ñu tuhun cha chinó iñi ñu.

¹⁸ Ta inga ñu cuví ñu tari nu canacoyo chiti chichi tu iñu: chiñi ñu tuhun Nyoo,

¹⁹ soco cutyoño ca iñi ñu cha cuenda tindoho cha iyó siqui ñuhu ñayivi ihya. Cha tyayii sandaví ñaha chi ñu, ta cuñi ñu tandihi ri nuu cha iyó. Tandihi ihya quihví xiñi ñu ta ña nyaá ca xiñi ñu tuhun Nyoo, ta ña chahá chi sacuvi ñu cha vaha cha cuenda cuan.

²⁰ Soco yihí ñu cha chiñi ñu tuhun Nyoo ta naquehén cuenda ñu, ta vaha sacuví ñu, tari nu canacoyo chiti nu ñuhú vaha cuví ñu. Yihí ñu cuví ñu tari yutun cha caña ta chaha tun oco uchi tahan chiti tahan tahan tun. Ta inga ñu cuví ñu tari yutun cha chaha uñi xico. Ta inga ñu tari yutun cha chaha ciento.

*Ma tyihi xehe yo ñuhu cha sandundichin Nyoo
añima yo coto tinyaa ra
(Lc. 8.16-18)*

²¹ Ta catyí tucu ra chi ñu:

—¿Atu quichi nyaca yo noo tima vatyí cananyaa yo chichi noo cajón o xiu chito? Ñima. Tima cuan cuñi chi tyiso yo noo nu sucun vatyí na sacundichin chi chichi vehe.

²² Ta tyicuan caa tucu, ñahri cha ñohó xehe, ta cuñun, tyi ma natuvi. Ta ñahri noo tuhun xehe, ta cuñun, tyi ma coto yo.

²³ Nyoho cha cutuñi iñi ndo, tyasoho ndo tuhun cahín —catyí ra Jesús chi ñu.

²⁴ Catyí tucu ra tyehe caa:

—Tyasoho vaha ndo tuhun cahín. Yoso cuhva sacuví ndo chi ñáyivi, yucuan cuhva sacuvi Nyoo chihin ndo. Ta cuaha ca cucuhva ra chi ndo tatu tyasohó ndo cha cahán ra.

²⁵ Vatyí ñu tyasohó cha cahín, cuaha ca cuhva Nyoo chi ñu. Soco ñu ña tyasohó, cutinyaa ndihi ra cha chiin cha cha yaha chaha ra chi ñu.

Nu sañahá ra Jesús cuhva chahnu noo chiti yutun

²⁶ Catyí tucu ra Jesús tyehe caa:

—Cha nyacá ñaha Nyoo aña ñáyivi cuví chi tari noo ra tachí noo chiti chichi ñuhú.

²⁷ Ta cuahan ra cua cusu ra. Yaha cuan ta ndicuita ra. Ta cuaha quivi yaha. Ta caña chiti cuan, ta chahnū yutun. Soco maa ra ña chitó ra yoso caa chahnū tun.

²⁸ Cha cuenda vatyí maa ñuhú cuan sacuvahá chi tun tyicuan ri caa. Xihna ca quitā xityin tun, ta yaha cuan yoco tun, yaha cuan ta quitā chiti nu yoco cuan.

²⁹ Ta tatu cha chityi chiti cuan, cutohon ra vatyí cha cha quivi cha coyo —catyí ra Jesús.

Nu sañahá ra Jesús vatyí tari chahnu noo chiti mostaza, tyicuan caa nducuaha nu nyacá ñaha Nyoo

(Mt. 13.31-32; Lc. 13.18-19)

³⁰ Ta catyí tucu ra Jesús:

—¿Ñáá chihin sanandiqui tahin cha nyacá ñaha Nyoo aña yo? ¿Ñáá chihin sandu inuu ri yo?

³¹ Cuví chi tari noo chiti mostaza cha tachí yo nu ñuhú. Ican chiti cuan, lee ca cha nuu tandihi chiti iyó siqui ñuhu ñayivi.

³² Soco tatu tachí yo, cañá ta cuahnu. Ta cahnu vavaha cuví tun. Ta nahnu soco tun, ta nyacua nya saa cha chicó nu tatyí cuví nyitatu ti nu vati tun.

Yoso caa sañahá ra Jesús chihin cuhva ri chi ñáyivi (Mt. 13.34-35)

³³ Tyehe caa sañahá ra Jesús chi ñu, chihin cuaha cuhva, nyacua nya nu cuví cutuñi íñi ñu.

³⁴ Ñahri maa cha catyí ra chi ñu tatu ñima chihin noo cuhva. Soco chi ra cachicá noo chihin ra, nacatyí vaha ra chi ra.

Nu sacutaxín ra Jesús tatyí ta miñi (Mt. 8.23-27; Lc. 8.22-25)

³⁵ Suri maa quívi cuan, cuhva cha cuaa, catyí ra chi ra cachicá noo chihin ra:

—Coho ndo inga chiyo miñi cuan.

³⁶ Tyicuan ta casandoꝝ ra chi ñáyivi. Ta cuahan ra Jesús chihin ra chichi canoa cha catuvi cuan. Ta cuahan tucu inga canoa chihin ra.

³⁷ Ta quichaha caa noo tatyí ñihi xaan, ta quichaha quihvi ndutya chichi canoa cuan, ta quichaha chitu.

³⁸ Ta ra Jesús quixí ra siqui noo cabecera cha nyaá inchiyo xiin canoa cuan. Ta casandoyꝝ ra chi ra, ta cacatyí ra:

—¡Maestro! ¿atu ñahri cuendon cha cuñi nyee yo?

³⁹ Tyicuan ta ndicuitá ra Jesús ta cahan ra chi tatyí cuan na cutaxin. Ta catyí ra chi ndutya miñi cuan tyehe caa:

—¡Taxi ri! ¡Taxi cunyaun! —catyí ra.

Ta tatyí cuan cutaxin, ta taxi taxi cuví.

⁴⁰ Tyicuan ta catyí ra Jesús chi ra cachicá noo chihin ra:

—¿Ñáá tuhun cha yuhví xaan ndo? ¿Atu ta chino ca iñi ndo? —catyí ra chi ra.

⁴¹ Soco maa ra cayuhví xaan ra cha cuví cuan. Ta cacatyí ra chi ra tahan ra:

—¿Yóó ra cuví ra ihya, vatyí nyacua nya tatyí ta miñi quichahá chi ra? —cacatyí ra.

5

Nu nduvaha ra yihí tatyí ña vaha chii ñuu Gadara (Mt. 8.28-34; Lc. 8.26-39)

¹ Chaá coyo ra yuhu miñi, inga chiyo nu nyaá ñuu Gadara.

² Ta quitá ri ra Jesús chichi canoa, ta quitá noo ra nu ñaña cuan ta chaá ra nu nanyaá ra Jesús. Ta yihí noo tatyí ña vaha añima ra.

³ Ta nu ñaña cuan iyó maa ra cuan. Ta yori maa cuví chasaha chi ra, ni ri chihin cadena.

⁴ Cuaha xaan chaha chahñi ñu chaha ra ta ndaha ra chihin cadena, soco chahnya ra. Yiquin maa sacuvi ra. Ta yori maa cuví chasaha chi ra.

⁵ Ñicahñu ta cha cuaa chicá noo ra canachaá ra nya nu yucu ta nya nu ñaña. Ta sañicuehé ra suri chi maa ra chihin yuu.

⁶ Soco cañi ca nanyehe ra chi ra Jesús, ta chino vavaha ra chaa ra. Ta chicuiñi chiti ra nuu ra.

⁷ Ta caná chaa ra ta catyí ra:

—¿Ñáá tuhun cha tyihún chuun chihin yuhu, yoho Jesús, Sehe Nyoo ra cuví nuu? Chacú ndahvi nuun chihin sivi Nyoo, ma sanyehun tindocho chii.

⁸ Catyí tatyí cuan tyehe caa vatyí ra Jesús cha catyí ra chi ra:

—¡Saña chi ra chiña, yoho tatyí ña vaha! —catyí ra.

⁹ Ta ra Jesús ndaca tuhun ra chi ra, ta catyí ra:

—¿Ñáá nañún?

Ta nacahan tatyí ña vaha cuan:

—Legión nañí, vatyí cuaha xaan ndi —catyí chi chi ra Jesús.

¹⁰ Ta chacu ndahvi tatyí ña vaha cuan nuu ra Jesús tacuhva cha ma tachi ra chi chi nu cañi.

¹¹ Ta yatyin ri yucu cuan nyicú cuaha xaan quini cachachí ti.

¹² Yucuan chaha catyí tatyí ña vaha cuan chi ra Jesús tyehe caa:

—Tachi chi ndi na quihvi ndi quini cuan —catyí tatyí cuan.

¹³ Tyicuan ta chaha ra Jesús, ta tatyí cuan quita coyo chi ra cuan, ta quihvi chi quini cuan. Ta cha uvi mil quini nyicú cuan, cachino ti, ta canacoyo ti chichi noo xahva yuhu miñi cuan, ta cachihí ti chichi ndutya cuan.

¹⁴ Tyicuan ta ra sahá cumi quini cuan, chino xaan ra chihin cha yuhví ra, ta chinacatyí ra chi ñáyivi ñuu cuan ta ñu ñohó nu chiqui. Ta quichí coyo ñáyivi, quichí nyehe ñu ñáá cha cuví.

¹⁵ Cuhva cha chaá coyo ñu nu nyaá ra Jesús, nanyehe ñu chi ra cha yihí tatyí ña vaha cuan chi. Ta vityin nyaá ra ñihnó ra sahama, ta cachi vaha iyó xiñi ra. Ta yuhví xaan ñu cuví.

¹⁶ Ta ñu cha nyehe cha cuví chi ra cuan ta chi quini cuan, canacatyí ñu chi tandihí ca ñu.

¹⁷ Tyicuan ta quichaha chacu ndahvi ñu nuu ra Jesús, na quita ra ñuu ñu.

18 Ta cuhva cha cua quihvi ra Jesús chichi canoa, ra cha yihí tatyí ña vaha cuan chi chacu ndahvi ra nuu ra Jesús na cuhva ra cuhun ra chihin ra.

19 Soco ra Jesús ña chaha ra cuhun ra, ta catyí ra chi ra:

—Cuanuhu nya vehun, nu nyaá ñáyivi chuun, ta nacatyun chí ñu tandihí cha sacuvi Sutu yo Nyoo chuhun, ta yoso caa cundahvi cuñi ra nyehe ra chuun.

20 Ta ra cuan cuahan ra ta quichaha nacatyí ra chí ñáyivi tandihí ñuu Decápolis tandihí cha sacuvi ra Jesús chihin ra. Ta tandihí ñu, iyo cuñí ñu.

*Nu nduvaha sehe ra Jairo ta ñaha sihi cha tñn
sahma ra Jesús*

(Mt. 9.18-26; Lc. 8.40-56)

21 Ta cuhva cha nachaa ra Jesús chihin canoa nya inga chiyo miñi cuan, chaa coyo cuaha ñáyivi nu nyaá ra. Ta ndoo ra yuhu miñi cuan.

22 Tyicuan ta chaa noo ra cuví nuu vehe ñuhu. Nañi ra Jairo. Ta cuhva cha nanyehe ra chi ra Jesús, chicuiñi chiti ra nuu ra.

23 Ta chacu ndahvi ra nuu ra ta catyí ra:

—Cha cuñí cúvi sehi. Coho chihin ta tyison ndahun siqui ña na nduvaha ña ta ma cúvi ña.

24 Tyicuan ta cuahan ra Jesús chihin ra, soco cuaha ñáyivi nyicón chí ra, ta nyacua nañi tahan ri ca maa ñu.

25 Ta mahñu ñáyivi cuan ñohó noo ñaha cha cuhvi. Cha quita uchi uvi cuiya ndoho ña cuehe cha chatí niñi ña.

26 Ta cuaha tindoho nyehe ña cha cuaha xaan doctor nyehe chí ña. Ta cha sanaa ña tandihí maa

cha iyó chi ña, soco ñahri maa tyinyee chi chi ña.
Soco ñihi ndihi ca nanduvi.

²⁷ Cuhva cha chitó ña tuhun milagru cha sacuvi
ra Jesús, tuhva ña ityi chata ra ta t̄in ña sahma ra.

²⁸ Vatyí chicá xiñi ña: “Ma chihin cha t̄in ri
sahma ra, ta nduvahi”, chicá xiñi ña.

²⁹ Ta caa cuhva ri cha t̄in ña sahma ra ta cha
chatí niñi ña cutaxin. Ta tuv̄i iñi coño ñuhu ña tyi
cha nduvaha ña chihin cuehe cuan.

³⁰ Tyicuan ta tuv̄i iñi ra Jesús vatyí nduvaha
noo ñáyivi chihin suhva tunyee iñi cha quit̄a chi
ra. Tyicuan ta nanyehe ra ityi chata ra ta
quichaha ndaca tuhun ra:

—¿Yóo cha t̄in sahme? —catyí ra.

³¹ Tyicuan ta ra cachicá noo chihin ra quichaha
catyí ra chi ra:

—Cha nyehun vatyí ñáyivi tyandahá chuun tyi
t̄ihin xaan. ¿Yoso caa cha ndaca tuhun: “Yóo cha
t̄in chii”? —cacatyí ra chi ra.

³² Soco ra Jesús nyehe ra ityi cuan ityi ihya,
vatyi cuñí ra nyehe ra yóo cha t̄in chi ra.

³³ Tyicuan ta ñaha cuan nihí ña chihin cha
yuhví ña vatyí chitó ña ñáá cha cuv̄i chi ña. Ta
chahan ña chicuiñi chiti ña nuu ra. Ta nacatyí ña
tandihí cha ndicha chi ra.

³⁴ Ta catyí ra Jesús chi ña:

—Cha nduvahun, Sihi, vatyí chinó iñun.
Cuahan, ta ma caca xiñun, vatyí cha nduvahun
chihin cuehe cha ndohun —catyí ra Jesús chi ña.

³⁵ Ni cahán ca ra Jesús ta chaq coyo ñu vehe ra
cuví nuu cuan, ta catyí ñu chi ra cha cuví sutu cha
luhlu cuan:

—Sehun, cha chih_i ña. Ñáá ri ca tuhun cha sayangon chi Ra Sacuaha chiña —catyí ñu.

³⁶ Soco ra Jesús ña quichah_a ra cha cah_an ñu, ta catyí ra chi ra cuví nuu vehe ñuhu cuan:

—Ma yuhvun. Ch_ino iñun —catyí ra chi ra.

³⁷ Ta ña chah_a ra yóo ca cha cuhun chihin ra, notuhun ri ra Pedro ta ra Jacobo ta ra Juan, yañi ra Jacobo.

³⁸ Ta cuhva cha cachaa coyo ra vehe ra cuví nuu vehe ñuhu, nyehe_e ra cha chacú chaa ñáy_iv_i ta caná chaa ñu.

³⁹ Quihv_i ra ta catyí ra chi ñu:

—¿Ñáá tuhun cha iyo xaan cuví ndo, ta chacú ndo tyiña caa? Cuehe luhlu ihya, ña chih_i cue, quixí cue —catyí ra chi ñu.

⁴⁰ Soco chacu cuehe ri ñu nyehe ñu chi ra. Tyicuan ta ra Jesús tava_a ra chi tandih_i ñu, ta quehen ra chi sutu cue ta sih_i cue ta chi ra cha cha_a coyo chihin ra, ta quihv_i coyo ra nu catuví cue.

⁴¹ Ta t_in ra ndaha cue, ta catyí ra chi cue:

—Talita cumi —ta cuñí chi catyí cuan: Catyí chuun, yoho cuehe luhlu, ¡nd_icuita!

⁴² Ta caa cuhva ri cua nd_icuita cuehe luhlu cuan. Iyó uchi uvi cuiya cue. Ta cuví nacaca cue. Ta ñáy_iv_i iyó xaan cuñí ñu.

⁴³ Soco ra Jesús ñihi chah_a ra tuhun chi ñu, tyi ma cahan maa ñu tuhun, ta caty_i ra chi ñu na cuhva ñu cha cachi cue.

6

*Nu ñoh_o ra Jesús ñuu Nazaret
(Mt. 13.53-58; Lc. 4.16-30)*

¹ Tyicuan caa cuv_i ta quit_a ra Jesús yucuan, ta cuanuhu ra nya ñuu ra. Ta ra cachicá noo chihin ra cuahan coyo ra chihin ra.

² Ta chaa quiv_i nyitatu ñáyiv_i, ta quichaha sañaha ra chichi vehe ñuhu. Ta cuaha ñáyiv_i chiñi tuhun cahán ra, ta iyo cuñí ñu, ta catyí ñu:

—¿Nya cutuhva ra ihya tandih_i tuhun ihya? ¿Yóo cha chaha cha chiñi tuñi ihya chi ra? ¿Yoso caa cha cuv_i sacuvi ra milagru nahnu xaan ihya?

³ ¿Atu ñima ra satyá vitu cuan cuv_i ra? Sehe cu María cuv_i chi ra. Ta yañi ra Jacobo, ta ra José, ta ra Judas, ta ra Simón, ta cuhva ra iyó tucu ñu chihin yo ihya —catyi ñu.

Ta quiñi cuñí ñu nyehe ñu chi ra.

⁴ Soco catyí ra Jesús chi ñu:

—Tandih_i ñu inga ñuu sahá ñu ñáyiv_i chi noo ra profeta Nyoo, soco ñu ñuu ra ña quichahá ñu chi ra, ni ñu vehe ra, ni ñáyiv_i chi ra —catyí ra Jesús.

⁵ Ta ña cuv_i sacuvi ra ni noo milagru yucuan, soco tyisó ra ndaha ra siqui suhva ri ñu cuhv_i, ta sanduvaha ra chi ñu.

⁶ Ta iyo cuñí ra vaty_i ñu ñuu ra ña chinó iñi ñu chi ra. Ta chahan ra tandih_i ñuu nyihi cha nyicú yatyin ri cuan, ta sañaha ra.

*Nu tyatyíño ra Jesús chi ra cachicá noo chihin ra nu cucahan ra tuhun Nyoo
(Mt. 10.5-15; Lc. 9.1-6)*

⁷ Yaha cuan ta cana ra chi ndi uchi uvi ra chicá noo chihin ra, ta quichaha tachi ra chi uvi uvi ra. Ta chaha ra ityi chi ra vaty_i tava ñehe ra chi taty_i ña vaha yihí aña ñáyiv_i.

⁸ Ta catyí ra chi ra vatyí ñahri maa cha cacuiso ra ityi. Ni yono, ni cha cachi ra, ni xuhun. Ñahri maa cuquindaha ra, noo ri yutun tuvi ra cuiso ra.

⁹ Ndichan ri quihí chaha ra. Ta noo ri sahma cuihno ra, ñima uvi tahan.

¹⁰ Ta catyí ra chi ra:

—Cuhva cha chaa ndo noo ñuu ta quihvi ndo noo vehe, ndo ndo yucuan ri nyacua nya cha quita ndo ñuu cuan.

¹¹ Ta tatu ñáyivi iyó noo ñuu, ña cuñí ñu tñn cuenda ñu chi ndo, ta ña cuñí ñu tyasoho ñu tuhun cahan ndo, quita ndo yucuan ta naquisi ndo ñiyaca chaha ndo tari noo seña vatyí ña vaha sacuví ñu. Cha ndicha catyí chi ndo, vatyí quivi cucutuñi chi ñáyivi iyó siqui ñuhu ñáyivi, ñu cha ma cuñi tñn cuenda tuhun cahan ndo, cuaha ca tñdoho cunyehe ñu, ta ñima ca ñu ñuu Sodoma ta ñuu Gomorra —catyí ra Jesús chi ra.

¹² Tyicuan ta quita coyo ra ta chicahan ra tuhun Nyoo chihin ñáyivi na ndu uvi iñi ñu cuatyí ñu, ta na nanducu ñu chi Nyoo.

¹³ Ta catava ñehe ra cuaha tatyí ña vaha añima ñáyivi. Ta cahyu ra acetye chi cuaha ñu cuhvi ta casanduvaha ra chi ñu.

Nu catyí chi yoso caa chihí ra Juan ra sacondutyá chi ñáyivi

(Mt. 14.1-12; Lc. 9.7-9)

¹⁴ Chito rey Herodes tuhun ra Jesús vatyí tandihí ñáyivi cahán ñu tuhun cha sacuví ra, ta chicá xiñi ra tyehe caa:

—Ra Juan ra sacondutyā chi ñáyivi cuví ra cuan. Nandotō ra cha yaha chihí ra, yucuan chaha iyó tunyee iñi chi ra —chicá iñi ra.

¹⁵ Inga ñu catyí ñu:

—Ra Elías profeta Nyoo ta cha naha cuví ra ihya —catyí ñu.

Ta inga ñu catyí ñu:

—Inga profeta Nyoo cuví ra, tari ra profeta Nyoo ra chiyō ta cha naha.

¹⁶ Cuhva cha chiñi ra Herodes tuhun ihya, catyí ra:

—Ican ra cuan cuví ra Juan cha tyihí tyiño tahnya sucun, ta vityin nandotō ra —catyí ra Herodes.

¹⁷ Tyicuan caa catyí ra Herodes vatyi cha catyi cu Herodías, ta tyihí ra chi ra Juan vehe caa ta chahñi ra chi ra chihin cadena. Cu Herodías cuan, ñasihí ra Felipe, yañi ra Herodes, cuví chi ña. Soco ra Herodes quehēn ra chi ña vatyi cuví ña ñasihí ra.

¹⁸ Ta ra Juan catyi ra chi ra Herodes vatyi ña vaha cha cunyaa ra chihin ñasihí yañi ra.

¹⁹ Yucuan chaha cu Herodías tasi xaan cuñí ña nyehe ña chi ra Juan, ta cuñí ña cahñi ña chi ra, soco ña cuví.

²⁰ Vatyi ra Herodes chitó ra vatyi ra Juan cuví ra noo ra vaha, ra ii, ta yuhví ra chi ra. Yucuan chaha sahá cuenda vaha ra chi ra, ña chaha ra cha sacuvi ña cha cuñí maa ña chihin ra. Ta vasi ña cuaha cutuñi iñi ra Herodes cha cahán ra Juan soco vaha cuñí ra chiñí ra cha cahán ra.

²¹ Soco cu Herodías ñihí ña noo kuhva nu ndihí ra Herodes cuiya, vatyi sacco ra noo vico cha

cuenda ra cacuví tyiño, ta comandante cuenda sindaro, ta ra nahnu ca ityi Galilea cuan.

²²⁻²³ Ta quihv̄i sehe cu Herodías vico cuan, ta quichaha chita chaha ña. Ta tahañ xaan iñi ra Herodes ta ra cha nyicú cuxiñi chihin ra. Ta tyaa ra cuhva vatyí cuhva ra ñáá cha cacan ña chi ra. Ta catyí ra chi ña:

—Cacan ñáá cha cuñún chii, ta cuhve chuun
—catyí ra chi ña.

Ta catyí ra vatyí cuhva ra ñáá ri cha cacan ña, vasi sava ñuhú ñuu nu nyacá ñaha ra.

²⁴ Quita ña ta catyí ña chi sihi ña:

—¿Ñáá cha caquen chi ra? —catyí ña.

Ta catyí sihi ña:

—Cacan xiñi ra Juan ra sacondutyá —catyí ña chi sehe ña.

²⁵ Ta numi ri ndihv̄i ñaha tyivaa cuan nu nyaá rey Herodes, ta catyí ña chi ra:

—Cuñí vatyí cahnyon xiñi ra Juan ra sacondutyá ta tyihun nuu noo coho ta cuhvon chii vityin vityin —catyí ña chi ra.

²⁶ Tyicuan ta nducuihya xaan iñi rey cuan. Soco cha tyaa ra cuhva vatyí cuhva ra chi ña, ta sin ri cachiñi ra canyicú chihin ra, ta ña cuñí ra nacahnu ra cha catyí ra chi ña.

²⁷ Numi ri tach̄i rey cuan tyiño chi noo sindaro na quichi nyaca ra xiñi ra Juan.

²⁸ Chahañ sindaro cuan chichi vehe caa cuan, ta chahnyā ra xiñi ra Juan. Ta quich̄i nyaca ra, yihí nu noo coho. Tyicuan ta chaha ra chi ñaha tyivaa cuan, ta maa ña nacuhv̄a ña chi sihi ña.

29 Cha chito ra canyicón chi ra Juan, chahan coyo ra chinaquehen ra coño ñuhu ra, ta cachityihí ra chichí ñuhú.

*Nu chahá ra Jesús cha cachi ohon mil ray#
(Mt. 14.13-21; Lc. 9.10-17; Jn. 6.1-14)*

30 Yahá cuan ta ndu ñin ri ra cha tyatyíño ra Jesús chí chihin ra, ta canacatyí ra tandíhi cha casacuví ra, ta cha casañahá ra nu chahan ra chicahan ra tuhun Nyoo.

31 Ta catyí ra Jesús chí ra:

—Ñaha ndo, na nyitatu yo chiin noo nu taxi ri iyó —catyí ra chí ra.

Tyicuan caa catyí ra vatyí cuaha ñáyivi cuahan ta vachi ñu, ta nyacua ña cacuyatyí ra cha cacachí ra.

32 Tyicuan ta maa ri maa ra Jesús ta ra cachicá noo chihin ra cuahan coyo ra chihin noo canoa noo nu yori maa ñáyivi nyicú, minoo nu taxi ri.

33 Soco cuaha ñu nyehe nu quitá ra. Ta canicohon nuu ñu chí ra. Ta cuahan coyo vavaha ñu chihin chaha ñu, quitá ñu tandíhi ñuu ta xihna ca maa ñu chaá coyo.

34 Cuhva cha chaá ra Jesús, quitá ra chichí canoa ta nanyehe ra tyí cuaha xaan ñu nyicú yucuan. Ta cundahvi cuñí ra nyehé ra chí ñu, vatyí nyicú ñu tari mbee cha yori ra sahá cumi chí tí. Ta quichahá sañaha ra cuaha tuhun chí ñu.

35 Cha cua iñi xaan, ta ra cachicá noo chihin ra catuhvá ra ta catyí ra chí ra:

—Cha iñi xaan, ta yucu taxin cuví ihya.

³⁶ Catyi chi ñu, na cuhun ñu ñuu cha nyicú yatyin ihya, ta sata ñu pan, vatyí ñahri cha cachi ñu iyó ihya —cacatyí ra chi ra.

³⁷ Soco nacahan ra Jesús, ta catyí ra:

—Cuhva maa ndo cha cachi ñu.

Canacahan ra ta catyí ra:

—Vasi saha tyiño ndi iñu yoo, soco ma caña xuhun cha cusata ndi pan cachi tandihí ñu ihya.

³⁸ Ta catyí ra Jesús chi ra:

—¿Yoso tahan pan nyisó ndo? Cuahan ndo cua nyehe ndo.

Ta cuhva cha cachito ra yoso tahan, cacatyí ra chi ra:

—Ohon tahan pan ta uvi tiyaca.

³⁹ Tyicuan ta catyi ra na cunyicú noo noo ticuítí ñu nu cuhu cuii cuan.

⁴⁰ Ta chicunyicú ñu cuenda ciento ta cuenda uvi xico uchi ñu.

⁴¹ Tyicuan ta quehen ra Jesús ndi ohon tahan pan cuan ta ninduvi tiyaca cuan. Ta nanyehe ndaa ra andivi, ta nacuhva ra tyahvi nyoo chi Nyoo, ta tahvi ra pan cuan, ta chaha ra chi ra cachicá noo chihin ra na casacha ra. Tyicuan ta casacha ra chi ñáyivi cuan. Yaha cuan ta casacha tucu ra ninduvi tiyaca cuan chi ñu.

⁴² Tandihí ñu cachachi ta ndaha iñi ñu.

⁴³ Ta nyacua ndoo ca ta casacutu ra uchi uvi tica chihin yiquin pan ta tiyaca.

⁴⁴ Ta ohon mil rayi cachachi pan cuan.

*Nu chicá ra Jesús nu miñi
(Mt. 14.22-27; Jn. 6.16-21)*

⁴⁵ Tyicuan ta catyi ra Jesus chi ra cachicá noo chihin ra na quihvi coyo ra chichi canoa vatyí

cuhun coyo ra ityi nuu nya inga chiyo miñi cuan ñuu Betsaida. Vatyí maa ra Jesús cunasacha xihna ra ñáyiví, tyicuan ta cuhun ra catyí ra.

⁴⁶ Ta cha yaha cuahan coyo ra, ra Jesús cuahan ra nu yucu, cua cacan tahvi ra.

⁴⁷ Ta cuhva cha cuaa, canoa nu ñohó ra cachicá noo chihin ra cha cuahan nya mahñu miñi cuan, ta ndoo noo tuhun ri maa ra.

⁴⁸ Ta nyehe ra vatyí ña cacuví vaha casacaca ra canoa cuan vatyí ñihi xaan tatyí. Ta cha ñaa ca cuan tuhva ra Jesús chicá ra nu ndutya cuan. Ta saha ri ra cha cua yaha ra nu canoa cuan.

⁴⁹ Soco cananyehe ra chi ra, chicá ra nu ndutya. Ta cacuñi maa ra vatyí noo cha sayuhvi cuví, ta cacana cha ra.

⁵⁰ Vatyí tandihí ra canyehe ra chi ra ta cayuhvi ra. Soco maa ra cahan ra chihin ra ta catyí ra:
— ¡Sanyee ndo iñi ndo! ¡Yuhu cuví! ¡Ma yuhvi ndo! —catyí ra.

⁵¹ Quihví ra chichi canoa nu canyicú ra, ta cutaxin tatyí cuan. Ta iyo xaan cacuñí ra

⁵² cha cuenda vatyí ta cutuñi ca iñi ra milagru cha sacuví ra chihin pan, vatyí ni ndava ca aña ra.

Nu sanduvaha ra Jesús chi ñu cuhví ñuu Genesaret (Mt. 14.34-36)

⁵³ Cayaha sava ra miñi cuan ta cachaa coyo ra ñuu Genesaret, ta cachahñi ra canoa cuan yuhu ndutya ri cuan.

⁵⁴ Ta cha quita coyo ri ra chichi canoa cuan, nicohon nuu ri ñáyiví chi ra Jesús.

⁵⁵ Ta cachino vavaha ñu nicahnu ityi cuan sacotó ñu vatyí cha ra. Ta quichi coyo ñu tandihí

ri ñuu, quichĭ nyaca ñu chi ñu cuhvĭ chihin chito nya nu nyaá ra Jesús.

⁵⁶ Ta tandihĭ ri ityi nu quihvĭ ra chichi ñuu luhlu o chichi ñuu nahnu, o chichi cuhu, chacun ñu chi ñu cuhvĭ yuhu ityi. Ta chacu ndahvi ñu nuu ra na cuhva ra cha tĭn ñu vasi chiin yuhu sahma ra. Ta tandihĭ ri ñu tĭn chi ra, nduvahā ñu.

7

*Nu sañahá ra Jesús ñáá cha sativĭ chi ñáyivĭ
(Mt. 15.1-20)*

¹ Yaha cuan ta ra fariseo ta suhva ra sacuahá cuenda ley vehe ñuhu quichĭ coyo ra nya ñuu Jerusalén, ta catuhvā ra chi ra Jesús.

² Ta canyehĕ ra vatyi yihĭ ra cachicá noo chihin ra Jesús cachachĭ ra ta ña nacatya ra ndaha ra tari cuhva cha tahán chi cha costumbre. Yucuan chaha cacahan nya ra chi ra.

³ Vatyi ra fariseo ta tandihĭ ñu Israel cuan nyicón ca ñu costumbre sutu chahnu ñu, vatyi ma cachi ra tatu ma ndoo ndaha ra cuaha chaha tari cuhva costumbre iyó chi ñu.

⁴ Ta tatu nachaa coyo ñu cha chahan ñu nuyahvi, ma cachi ñu tatu ma sacuvi ñu cuhva cuan cha canacatya xaan ñu ndaha ñu. Ta iyó cuaha ca costumbre cha canyicón ñu. Iyó noo cuhva cha tahán chi nacatya ñu vasu, jarra, ta tandihĭ ndaha tyiño caa cha iyó chi ñu ta cama ñu ñandihĭ.

⁵ Tyicuan ta ra fariseo ta ra sacuahá cuenda ley cuan candaca tuhun ra chi ra Jesús, ta catyĭ ra:

—¿Ñáá tuhun ña sacuvĭ ra nyicón chuun cuhva costumbre sutu chahnu yo? Vatyi ña nacatya ra

ndaha ra tari cuhva tahán chi tatu cuacachi ra xita —catyí ra chi ra.

⁶ Ta nacahan ra Jesús, ta catyí ra:

—Ndicha cha cahan ra Isaías tuhun ndo vatyí sahá ndo tyi vaha ndo ta ña ndicha ndo. Catyí ra tyehe caa:

Ñáyivi ihya, chihin yuhu ri ñu catyí ñu tyi cuñí ñu chii.

Soco ñima chihin cha tandihi ñima ñu, tyi siin nu nyaá xiñi ñu.

⁷ Ñahri maa tuhun cha sacahnú ñu chii, vatyí cha sañahá ñu chi tahan ñu, maa maa ri maa cuhva sañahá ñáyivi ri cuví, tyaa ra Isaías tuhun ndo.

⁸ Vatyí nyoho sandoó ndo cuhva catyí Nyoo, ta nanyicón ndo cuhva costumbre ñáyivi ri, tuhun cha nacatya xaan ndo ndaha tyiño ndo, ta cuaha cha tyicuan caa sacuví ndo.

⁹ Nyoho sanducaxiin ndo tuhun cha catyí Nyoo tyi sacuvi ndo, tacuhva vatyí cuví sacuvi ndo costumbre cha iyó ndo.

¹⁰ Soco ra Moisés catyí ra nu ley cha tyaa ra: “Saha ndo ñáyivi chi sutu ndo ta chi sihi ndo.” Ta catyí tucu ra: “Tandihi ñu cha cahan ña vaha chi sutu o chi sihi ñu, tahán chi cúvi ñu.” catyí ra Moisés nu ley Nyoo.

¹¹ Soco nyoho catyí ndo tyi noo ñáyivi cuví catyí ñu chi sutu ñu o chi sihi ñu tyi ma cuvi tyinyee ñu chi ñu vatyí tandihi cha iyó chi ñu Corbán cuví. (Cuñí chi catyí: “Cha chahí chi Nyoo cuví.”)

¹² Ta tatu catyí ñu tyicuan caa, ña cuñí ca chi cha tyinyee ñu chi sutu ñu o chi sihi ñu catyí ndo.

¹³ Ta tyicuan caa sacuachiyó ndo tuhun cha catyí Nyoo tyi sacuvi ndo, vatyí cuñí ndo sacuvi ri maa ndo tuhun cha iyó ndo. Ta cuaha ca cha inuu ri caa sacuví ndo —catyí ra Jesús.

¹⁴ Tyicuan ta cana tucu ra Jesús chi ñáyivi ta catyí ra chi ñu:

¹⁵ —Tyasoho vaha tandihí ndo tuhun cahín, ta natyihí tuñi iñi ndo. Cha quihví yuhu ñáyivi ta chachí ñu, ña cuví sativí chí chí ñu. Soco cha quitá añañima ñu, ican cuan sativí chí chí ñu.

¹⁶ Nyoho cha cutuñí iñi ndo, tyasoho ndo tuhun cahín —catyí ra Jesús chí chí ñu.

¹⁷ Tyicuan ta sandoq ra Jesús chí ñáyivi cuan, ta quihví ra chichi vehe. Ta ra cachicá noo chihin ra candaca tuhun ra chí ra ñáá cha cuñí chí catyí tuhun cuan.

¹⁸ Ta catyí ra Jesús chí ra:

—Tu tyicuan caa, ni nyoho, ña cutuñí iñi ndo.

¿Atu ña cutuñí iñi ndo vatyí cha quihví chichi yuhu yo ña sativí chí chí yo?

¹⁹ Vatyí ñima añañima yo quihví chí, soco chichi yo. Ta yaha cuan ta quita chí chichi coño ñuhu yo —catyí ra Jesús.

Chihin cuan cuñí ra catyí ra vatyí tandihí nyayu ta vaha cachi yo.

²⁰ Ta catyí tucu ra:

—Cha quitá añañima ñáyivi, ican cuan sativí chí ñu.

²¹ Vatyí añañima ñu quitá cha ña vaha chicá xiñi ñu, ta sacuví ñu cha ña vaha. Yihí ñu iyó ñu chihin rayi o chihin ñusihí ta ñima ñasihí ra cuví, ta ñima yi ñu cuví. Yihí ñu casuhú ñu. Yihí ñu cachahñí ñu.

22 Yihí ra iyó ñasihi ra ta chicá noo ra chihin inga ñu. Yihí ñu quichi cuvi iñi ñu cha chii inga ñáyivi. Yihí ñu sacuví ñu cha quiñi caa. Yihí ñu sandaví ñaha ñu. Yihí ñu iyó viciu chi ñu. Yihí ñu nyiyo iñi ñu. Yihí ñu ñiñi ñu cuendu. Yihí ñu cahnu sahá ñu chi ñu. Yihí ñu ña chaa cha chiñi tuñi xiñi ñu.

23 Tandihí tuhun ña vaha ihya, quitá chi ityi chichi añima ñáyivi, ta sativí chi chi ñu —catyí ra chi ra.

*Noo ñaha inga ñuu cha chino iñi chi ra Jesús
(Mt. 15.21-28)*

24 Yahā cuan ta quitā ra Jesús yucuan, ta cuahan ra ityi ñuu Tiro ta Sidón. Quihví ra chichi noo vehe ta ña cuñí ra cha coto ni noo ñáyivi, soco ña cuví tixehe nuu ra.

25 Ta sihi noo ñaha tyivaa cha yihí noo tatyí ña vaha añima, numi ri chito ña tuhun ra Jesús. Ta chaa ña ta chicuiñi chiti ña nuu ra.

26 Ñaha cuan, ñaha inga ñuu cuví ña, ñaha ñuu Sirofenicia cuví ña. Quichí ña ta chacú ndahvi ña nuu ra Jesús na tava ra tatyí ña vaha cha yihí añima sehe ña.

27 Soco catyí ra Jesús chi ña:

—Saña, ñacachi xihna ca ñu Israel ñu cuví sehe Nyoo, vatyí ña vaha cha tinyaá yo pan chi sehe yo ta cuhva yo cachi ina —catyí ra Jesús chi ña.

28 Ta nacahan ña ta catyí ña:

—Ndicha, Tata, soco ina cuan chachí tucu ti yiquin cha canacoyo xiu mesa cuan —catyí ña chi ra.

29 Tyicuan ta catyí ra Jesús chi ña:

—Vaha nacahun. Ta cha cuenda cuan cuví cuhun, vatyí tatyí ña vaha cha yahá quita chi añima sehun —catyí ra chi ña.

³⁰ Ta cuhva cha nachaa ña vehe ña, catuví sehe ña nu chito, ta tatyí ña vaha cuan cha yahá quita chi cue.

Nu sanduvahá ra Jesús chi noo ra soho ta ñihi

³¹ Ta quita tucu ra Jesús ñuu Tiro, ta yahá ra ñuu Sidón, ta cuahan ra ityi ñuu cha canañí Decápolis, ta nachaa ra miñi Galilea.

³² Nu nyaá ra Jesús yucuan, quichí nyaca ñu chi noo ra soho ta ña cuví vaha cahán ra. Ta chacu ndahvi ñu nuu ra Jesús na tyiso ra ndaha ra siqui ra.

³³ Tava sñn ra Jesús chi ra ñn chiyo xiin, nu yori ñáyivi, ta tyihí ra nundaha ra chichi soho ra, ta tyaa sñ ra nu yaa ra.

³⁴ Yucuan ta nanyehé ndaa ra andivi. Ta naxita ra tatyí ra, ta catyí ra:

—¡Efata! —ta cuñí chi catyí: ¡Nuña! —catyí ra.

³⁵ Ta chihin cuan nuña soho ra soho cuan, ta nduvahá yaa ra, ta nacañan vaha ra.

³⁶ Ta catyí ra Jesús chi ñu tyi yori chihin cahan ñu tuhun, soco tatu catyí ra chi ñu tyicuan caa, ñihi ca canacatyí ñu.

³⁷ Ta iyo cuñí ñu ta catyí ñu:

—Tandihí ta vaha sacuví ra. Nyacua cuví nacuiñi ñáyivi soho sahá ra ta cuví tucu nacahan ñáyivi ñihí ñandihí.

8

*Nu chahá ra Jesús cha cachi cumi mil ñáyivi
(Mt. 15.32-39)*

¹ Qui^vi cuan natacā tucu cuaha xaan ñáy^vi. Ta ñahri maa cha cachi ñu iyó. Tyicuan ta canā ra Jesús chi ra cachicá noo chihin ra, ta catyí ra:

²—Cundahvi cuñí nyehi chi ñáy^vi ihya, vatyí cha uñi qui^vi nyicú ñu ihya chihin, ta ñahri maa cha cachi ñu iyó.

³Tatu natachi chi ñu nya vehe ñu cucachi ñu, coto coñaa ñu ityi, vatyí yíhí ñu cañi quichí coyo ñu —catyí ra Jesús chi ra.

⁴Ta nacahan ra cachicá noo chihin ra, ta catyí ra chi ra:

—¿Soco yoso caa cuhva yo cha cachi ñu ihya, ta yori maa ñáy^vi iyó ta xico ñu chi yo?

⁵Ta ndacā tuhun ra Jesús chi ra, ta catyí ra:

—¿Yoso tahan pan nyisó ndo?

Ta cacatyí ra:

—Ucha tahan.

⁶Ta catyí ra na cunyicu ñáy^vi cuan nu ñuhú. Ta quehen ra ucha pan cuan, ta nacuhvā ra tyahvi nyoo chi Nyoo. Yahā cuan ta tahvī sava ra pan cuan, ta चाहā ra chi ra cachicá noo chihin ra, na casacha ra chí ñáy^vi cuan.

⁷Ta canyisó tucu ra suhva tiyaca nyihi. Ta nacuhvā tucu ra Jesús tyahvi nyoo chi Nyoo, ta चाहā ra chi ra na casacha ra.

⁸Tandihí ñu cachachí ñu, ta cachitu chichi ñu. Ta casacutu ra ucha tahan tica chihin yiquin cha ndoo ca.

⁹Ta cha cumi mil tahan ñu cachachí. Yahā cuan ta catyí ra Jesús chi ñu na cunuhu coyo ñu.

¹⁰Ta quihvī ra chichi noo canoa chihin ra cachicá noo chihin ra. Ta cuahan coyo ra ityi Dalmanuta.

Nu cacatyí ra fariseo chi ra Jesús na sacuvi ra noo milagru

(Mt. 16.1-4; Lc. 12.54-56)

¹¹ Tyicuan ta cachaꞗ coyo ra fariseo, ta quichaha cuvi yuhu ra chihin ra Jesus. Ta cacatyí ra chi ra na sacuvi ra noo milagru tatu ndicha cha Nyoo tachĭ chi ra. Tyicuan caa catyĭ ra vatyĭ cuñĭ ra nducu nyehe ra chi ra.

¹² Ta ra Jesús uhvi uhvi naxitꞗ ra tatyĭ ra, ta catyí ra:

—¿Ñáá tuhun cha chicán ñáyivĭ iyó vityin milagru? Cha ndicha catyí chi ndo vatyĭ ma sacuvi ni noo milagru nyehe ndo —catyí ra chi ra.

¹³ Tyicuan ta sandoo ra chi ra, ta nandĭhvĭ ra chichi canoa ta cuahan ra inga chiyo miñi.

Cuhva iyó ra fariseo tari yuchan iya cuvi, catyí ra Jesús

(Mt. 16.5-12)

¹⁴ Naa ñni ra cachicá noo chihin ra Jesús cacuiso ra cha cacachi ra. Ta noo pan ri ñohó chihin ra chichi canoa cuan.

¹⁵ Tyicuan ta catyí ra Jesús chi ra:

—Saḥa ndo cuenda chi ndo chihin yuchan iya ra fariseo ta ra Herodes —catyí ra chi ra.

¹⁶ Ta ra cachicá noo chihin ra quichaha cacatyĭ ra chi ra tahan ra:

—Cha cuenda vatyĭ ñahri pan nyisó yo, yucuan cuenda caḥan ra tuhun cuan —catyí ra chi ra tahan ra.

¹⁷ Tuví ñni ra Jesús cha ndatuhún ra, ta catyí ra chi ra:

—¿Ñáá tuhun cha catyí ndo tyi ñahri pan nyisó ndo? ¿Atu ta cutuñi ca iñi nyoho? ¿Atu ta coto ca ndo? ¿Atu ni ndava xaan aña ndo?

¹⁸ Nyaá chiti nuu ndo, ¿atu ña nyehé ndo? Nyaá soho ndo. ¿Atu ña chiñi ndo? ¿Atu ña nichon iñi ndo

¹⁹ quivi cha sache ohon tahan pan cuan chi ndi ohon mil rayi? ¿Yoso tahan tica yiquin naquehen ndo? —catyí ra Jesús, ndacá tuhun ra chi ra cachicá noo chihin ra.

Ta maa ra cacatyí ra:

—Uchi uvi.

²⁰ Ta catyí tucu ra Jesús chi ra:

—Ta quivi sache ucha tahan pan chi cumi mil ñu, ¿yoso tahan tica tyitu nacoñehé ndo?

Ta cacatyí ra:

—Ucha tahan.

²¹ Tyicuan ta catyí ra Jesús chi ra:

—¿Atu ta cutuñi ca iñi ndo? —catyí ra chi ra cachicá noo chihin ra.

Nu sanduvahá ra Jesús chi noo ra cuaa ñuu Betsaida

²² Yahá cuan ta chaá ra Jesús chihin ra cachicá noo chihin ra nya ñuu Betsaida. Ta quichi nyaca ñu chi noo ra cuaa. Ta cachacu ndahvi ñu nuu ra na tin ra chi ra.

²³ Tyicuan ta tin ra ndaha ra cuaa cuan, ta cuahan ra chihin ra ityi chata ñuu. Ta tyaa si ra chiti nuu ra, ta tyiso ra ndaha ra siqui ra, ta ndaca tuhun ra chi ra tatu cuví nyehe ra chiin.

²⁴ Ra cuaa cuan nanyehé ra ta catyí ra:

—Nyhí in cahnu ri maa chi ñáyivi. Cuhva caa yutun caa ñu cahvi iñi, soco chicá ñu —catyí ra.

²⁵ Tyicuan ta t̄in tucu ra Jesús ch̄it̄i nuu ra inga chaha, ta maa ra nanyehe vaha ra ta nduvah̄a ra. Nanyehe cachi vaha ra tand̄ih̄i.

²⁶ Tyicuan ta natachi ra Jesús chi ra ta catyí ra chi ra:

—Ma qūihvun chichi ñuu ta ni yori chihin cahun tuhun.

Nu catyí ra Pedro vatyí ra Jesús cuví Cristo (Mt. 16.13-20; Lc. 9.18-21)

²⁷ Yah̄a cuan ta chah̄an ra Jesús chihin ra cachicá noo chihin ra ñuu cha ca iyó Cesarea Filipino. Ta ityi cuahan ra, ta ndac̄a tuhun ra chi ra cachicá noo chihin ra, ta catyí ra:

—¿Ñáá catyí ñáyivi? ¿Yóó ra cuví yuhu? —catyí ra chi ra.

²⁸ Ta canacah̄an ra ta catyí ra:

—Yihí ñu catyí ñu tyi ra Juan ra sacondutyá chi ñáyivi cuvún. Inga ñu catyí ñu tyi ra Elías cuvún. Ta inga ñu catyí ñu tyi inga ra profeta Nyoo cuvún —cacatyí ra chi ra.

²⁹ Tyicuan ta ndac̄a tuhun ra chi ra, ta catyí ra:

—¿Ta nyoho, yóó ra cuví yuhu, cuñí tucu nyoho?

Ra Pedro catyí ra chi ra:

—Yoho cuví Cristo.

³⁰ Soco catyí ra Jesús chi tand̄ih̄i ra tyi yori chihin cacahan ra tuhun cuan.

Nu cah̄an ra Jesus tuhun tyi cucúvi ra (Mt. 16.21-28; Lc. 9.22-27)

³¹ Tyicuan ta quichah̄a sañaha ra vatyí Raȳi cha quich̄i nya gloria cunyehe ra cuaha xaan t̄indoho. Ta ra mandoñi ta ra cacuví nuu chi tata sutu ta ra casacuahá cuenda ley vehe ñuhu ma cuñi ra

nat̄in cuenda ra chi ra. Catȳi ra Jesús chi ra vatȳi
cucah̄ni ñu chi ra soco chich̄i cha cu uñi quiv̄i
cunandoto ra.

³² Catȳi cachi ra chi ra tuhun ihya. Tyicuan ta
tavā s̄in ra Pedro chi ra ta quichaha catȳi ra tyi
ña vaha cha cahan ra cha tyicuan caa.

³³ Soco ra Jesús nanyocavā ra, ta nanyeh̄e ra chi
inga ra cachicá noo chihin ra. Ta quichaha cahan
ra chi ra Pedro ta catȳi ra:

—¡Cūachiyo chuun nui, cuihna! Vatȳi yoho ña
chicá xiñun tari cuhva chicá xiñi Nyoo, soco tari
chicá xiñi ñáyiv̄i, chicá xiñun —catȳi ra Jesús chi
ra Pedro.

³⁴ Tyicuan ta canā ra Jesús chi ñáyiv̄i ta chi ra
cachicá noo chihin ra ta catȳi ra chí ñu:

—Tatu nya ndo cuñí ndo cunyicon ndo chii,
cuñí chi cahnya ndo iñi ndo tuhun maa ndo. Ta
ma ndu uvi iñi ndo cha yih̄i ndo cuende vasi
nyehe ndo t̄indoho cha cuende. Vatȳi yucuan
cuví cruzi cha tahán chi cuiso ndo.

³⁵ Vatȳi nya ndo ña cuñí ndo cúvi ndo cha
cuende, suri cha cúvi maa ndo cuvi, ta cuhun
ndih̄i ndo anyaya. Soco nya ndo cuhva ndo ñayiv̄i
ndo cha cuende ta cha cuenda tuhun Nyoo,
cucacu añima ndo.

³⁶ Tatu sacunaa ndo añima ndo anyaya, ¿ñáá ri
tuhun cha saha ganaa ndo tandih̄i cha tyaȳi cha
iyó siqui ñuhu ñayiv̄i?

³⁷ Vatȳi tatu sacunaa ndo añima ndo, ñahri maa
cha iyó cha cuví cuhva ndo ta sacacu ndo añima
ndo.

³⁸ Tatu nya noo ndo cucahan nuu ndo nyehe
ndo chii, ta cucahan nuu ndo tuhun cahín nuu

ñáyiví cha iyó cuatyí ta ña quichahá tuhun Nyoo, yuhu Rayi cha quichi nya gloria cucahan tucu nuu mai nyehi chi ndo quiví quichi tiqui chihin ángel cuenda Nyoo. Vatyí cuquichi chihin cha tyaqui maa Suti.

9

¹Cha ndicha catyí chi ndo, vatyí yihí ndo cha nyicú ndo ihya, ma cúvi ñaha ndo nyacua nya nyehe ndo yoso caa nyacá ñaha Nyoo. Vatyí cuquichi chihin tunyee iñi ra —catyí ra Jesús.

Nu sañahá Nyoo yoso caa ra Jesús noo cha ndicha nu nyacá ñaha ra (Mt. 17.1-13; Lc. 9.28-36)

²Iñu quiví yaha ta cuahan ra Jesús noo yucu sucun. Ta ra Pedro, ra Jacobo, ta ra Juan ri cuahan coyo chihin ra. Ta yucuan nasama cuhva caa nuu ra Jesús.

³Nduxiño xaan sahma ra ta cuichin xaan nanduví. Yori maa siqui ñuhu ñayiví ihya cuví nacatya ta nducuichin tyicuan caa.

⁴Ta cananyehe ra tyi nanyaá ra Elías ta ra Moisés, candatuhún ra chihin ra Jesús.

⁵Tyicuan ta ra Pedro catyí ra chi ra Jesús:

—Maestro, ¡vaha xaan cha nyicú ndi ihya! Na savaha ndi uñi tahan tiyahva: noo cha cuenda maun, ta noo cha cuenda ra Moisés, ta nonga cha cuenda ra Elías —catyí ra Pedro,

⁶vatyí ña chitó ra ñáá tuhun cahán ra. Vatyí maa ra ta inga ra cayuhví ra.

⁷ Tyicuan ta noo xica noo vico siqui ra ta sahvi chi ra. Ta chichi vico cuan tyacu noo ndusu cha catyí:

—Ican ihya cuví Sehi, ta cuñí xain chi ra. Tyasoho ndo tuhun cahan ra —catyí ndusu cuan.

⁸ Ta cuhva cha cananyehe ra, yori ca ra tayucú chihin ra, noo ri ca maa ra Jesús.

⁹ Cuhva cha cuanoo coyo ra yucu cuan, catyí ra Jesús chi ra tyi ma cacahan ra tuhun cha canyehe ra yucuan, soco nya yaha cha nandoto Rayi cha quichi nya gloria, tyicuan ta cuvi cahan ra tuhun.

¹⁰ Yucuan chaha ña cacahan maa ra tuhun, vasi cacatyí ra chi tahan ra ñana vaha tuhun cuví cha cunandoto ra.

¹¹ Tyicuan ta quichaha candaca tuhun ra chi ra Jesús:

—¿Ñáá tuhun cha catyí ra casacuahá cuenda ley vehe ñuhu vatyí cuquichi xihna ca ra Elías?

¹² Ta nacahan ra, ta catyí ra:

—Cha ndicha vatyí xihna ca ra Elías nyaá quichi ta sanduvaha ra tandihi. ¿Ta yoso caa catyí tuhun Nyoo cuenda Rayi cha quichi nya gloria? Catyí chi tyi cunyehe ra tindoho, ta ma cuñi nyehe ñáyivi chi ra.

¹³ Soco yuhu catyí chi ndo tyi cha yaha quichi ra Elías. Ta sacuvi maa ñáyivi cha cuñi ñu chihin ra, tari cuhva catyí nu tutu Nyoo cha cucuvi chi ra —catyí ra Jesús chi ra.

Nu sanduvaha ra Jesús chi noo ra tyivaa cha yihí noo tatyí ña vaha chi (Mt. 17.14-21; Lc. 9.37-43)

14 Yahā cuan ta nachaa coyo ra nu nyicú inga ra cachicá noo chihin ra Jesús. Ta canyehe ra tyi cuaha ñáyivi tayucú nicachico. Ta nyicú tucu ra sacuahá cuenda ley yucuan, ta cacuví yuhu ra chihin ra.

15 Tyicuan ta cha nanyehe ñu chi ra Jesús, tandihí ñu iyo cuñí ñu, ta cachino ñu chicuhva ñu nocumi chi ra.

16 Tyicuan ta ndaca tuhun ra Jesús chi ra cacuvi yuhu cuan ta catyí ra:

—¿Ñáá cuenda cuví yuhu xaan ndo? —catyí ra chi ra.

17 Ta noo ra nanyaá chichi cha cuaha ñáyivi yucuan, nacahan ra ta catyí ra:

—Maestro, ihya vachi nyaque chi sehi. Yihí noo tatyí ña vaha chi cue ta sacuñihí chi cue.

18 Vatyí tandihí ri nu tñn tatyí cuan chi cue, sanduva chi cue nu ñuhú, ta yucuan quita tiñi yuhu cue ta cahñi noho cue. Ta ndundava cue. Cha catyí chi ra cachicá noo chuhun na tava ra tatyí ña vaha cuan, soco ña cacuví chi ra —catyí ra cuan chi ra Jesús.

19 Nacahan ra Jesús ta catyí ra:

—¡Nyoho ñu ña chinó iñi cuví ndo! ¿Yoso tahan ca quivi cunyai chihin ndo ta cunyei tisihi ndo nyacua nya cha cutuhva ndo ta chino iñi ndo chii?

Ta catyí ra chi ra cuan:

—Nyaca chi ra luhlu chiña tyehe —catyí ra.

20 Quichi nyaca ra chi ra luhlu cuan. Ta cuhva cha nanyehe tatyí cuan chi ra Jesús, quehen tatyí cuan chi cue. Ta nduva cue nu ñuhú, sacañuhú cue chi cue, ta quita tiñi yuhu cue.

21 Tyicuan ta ndacā tuhun ra Jesús chi sutu cue:
—¿Ama quichaha cuvi chi ra tyehe caa? —catyí
ra chi ra.

Ta nacahān sutu cue, ta catyí ra:

—Nyata luhlu ra.

22 Ta cuaha chaha tyih̄i tatyí ña vaha ihya chi
cue nu cayú ñuh̄u, o nu ndutya. Cuñi chi cah̄ni chi
chi cue. Soco tatu cuví chuun, cundahvi cuñi
nyehun chi ndi, ta tyinyeun chi ndi —catyí sutu
cue chi ra Jesús.

23 Ta catyí ra Jesús chi ra:

—Tatu chinó iñun, tand̄ih̄i ta cuví cha cuenda
ñu chino iñi —catyí ra Jesús.

24 Tyicuan ta sutu cue canachāa ra ta catyí ra:

—¡Chinó iñi! ¡Tyinyee chii na chino ca iñi!

—catyí ra chi ra Jesús.

25 Cuhva cha nyehē ra Jesús tyi cuaha ñáyivi
candu iñ̄n ri, ta tavā ñehe ra chi tatyí ña vaha cuan,
ta catyí ra:

—Yoho tatyí ña vaha cha sañih̄i ta sasohó chi
cue ihya, catyí chuun, na quiton. Saña chi ra
luhlu ihya, ta ma ndihvi con chi ra —catyí ra Jesús
chi tatyí ña vaha cuan.

26 Ta tatyí cuan quiñi xaan canachāa ta na quisi
chi chi cue inga chaha ta quitā. Ta sandoo tatyí
cuan chi cue tari noo ndiyi. Ta cuaha ñu catyí
vatyi cha chih̄i cue.

27 Soco tiñ̄n ra Jesús ndaha cue, ta nacoñeh̄e ra
chi cue, ta nicuinanyāa cue.

28 Tyicuan ta quihvī ra Jesús noo vehe, ta ra
cachicá noo chihin ra candacā tuhun ra chi ra ta
catyí ra:

—¿Ñáá tuhun ña cuv̄i tava ndi chi tatyí ña vaha cuan?

²⁹ Ta catyí ra Jesús:

—Cha cuenda vatyí tahan tatyí ña vaha ihya, quitá, soco chihin cha ma cachi yo ta cacan tahvi yo chi Nyoo —catyí ra chi ra.

Nu cahán ra Jesús tuhun inga chaha vatyí cucúvi ra (Mt. 17.22-23; Lc. 9.43-45)

³⁰ Quīvi cha quita coyo ra yucuan, yahá coyo ra ityi Galilea. Ta ña cuñí ra Jesús cha coto ñáyivi.

³¹ Vatyí sañahá ra chi ra cachicá noo chihin ra. Ta catyí ra chi ra vatyí Raȳi cha quichi nya gloria cunacuhva cuenda ñu chí ra ndaha ñáyivi. Ta cucahñi ñu chi ra, soco cha cu uñi quīvi cunandoto ra.

³² Soco ña cacutuñí iñi ra tuhun cahán ra chihin ra. Ta cayuhví ra candaca tuhun ra chi ra.

¿Yóó ra cahnu ca?

(Mt. 18.1-5; Lc. 9.46-48)

³³ Tyicuan ta cachaa coyo ra ñuu Capernaum. Ta cuhva cha nyicú ra nya vehe, ra Jesús ndaca tuhun ra chi ra ta catyí ra:

—¿Ñáá tuhun cuv̄i xaan yuhu nyoho ityi vachi yo? —catyí ra ndaca tuhun ra.

³⁴ Taxi taxi cacuv̄i ra, vatyí ityi vachi coyo ra, ta cacuví yuhu ra nya ra cuví ra ra cahnu ca.

³⁵ Tyicuan ta chicunyā ra Jesús ta cana ra chi ndi uchi uvi ra chicá noo chihin ra, ta catyí ra chi ra:

—¿Nya ndo cuñí ndo cuvi ndo nuu, cuñí chi cha cuví ndo ra nu ndih̄i cha nuu tandih̄i ra, ta sacuvi ndo tyiño nuu tandih̄i ra? —catyí ra Jesús chi ra.

³⁶ Tyicuan ta quehen ra chi noo ra cuehe luhlu ta chinanyaá ra chi cue mahñu ra. Ta tyihj sucun ndaha ra chí cue, ta catyí ra:

³⁷ —Ñáyivi cha natín cuenda chi noo ra cuehe luhlu chihin sivi, chi yuhu natín cuenda ñu. Ta ñu natín cuenda chii, ñima chi yuhu ri natín cuenda ñu, soco chi ra cha tachi chii ñandihí.

Tatu ña cuahan ñáyivi siqui yo, tumañi iñi chi yo cuahan ñu
(Mt. 10.42; Lc. 9.49-50)

³⁸ Tyicuan ta catyí ra Juan chi ra Jesús:

—Maestro, nyehe ndi chi noo ra cuan ta chihin sivun tavá ñehe ra chi tatyí ña vaha. Soco vatyí ñima chihin yo chicá noo ra, catyí ndi chi ra tyi ma sacuvi ca ra —catyí ra Juan chi ra Jesús.

³⁹ Soco catyí ra Jesús chi ra:

—Ma casi ndo. Vatyí ni noo ra cha casacuvi milagru chihin sivi ta yaha cuan ta caña iñi ra cahan ña vaha ra siqui.

⁴⁰ Vatyí ñu cha ña cuahan siqui yo, tumañi iñi chi yo cuahan ñu.

⁴¹ Tatu cuhva noo ñu, vasi noo vasu ndutya coho ndo chihin sivi, cha cuenda vatyí ñu cuenda yuhu ra Cristo cuví ndo, cha ndicha vatyí cuñihí ñu cha cuacuhva Nyoo chí ñu.

Yica xaan cha sanacava yo chi noo yañi yo nu cuatyí
(Mt. 18.6-9; Lc. 17.1-2)

⁴² Tatu yóo ñu sanacava nu cuatyí chi noo ñu chinó iñi chii, vaha taxin ca cuhñi ñáyivi noo yuu sucun ñu ta tuchi ñu chí ñu cuan nu tyañuhu.

43 Tatu ndahun sanacavá chuun nu cuatyí, vaha taxin ca çahnya. Vatyí vaha ca cha quihvun nu coun chihin Nyoo chihin cha luu ndahun ta ñima ca chihin cha ninduvi ndahun ta cuhun anyaya nu cayú ñuhú cha ma ndahva ca maa.

44 Ta yucuan ña chihí tindacu chachí chi ñu, ta ñuhú ña ndahva maa ni noo chaha.

45 Ta tatu chahun ta sanacavá chuun nu cuatyí, vaha taxin ca çahnya. Vatyí vaha ca cuhun nu coun chihin Nyoo chihin cha luu chahun ta ñima ca chihin cha ninduvi chahun ta tuchi Nyoo chuun anyaya. Vatyí yucuan ma ndahva ca maa ñuhú.

46 Ta ña chihí tindacu chachí chi ñu, ta ñuhú ni noo chaha ña ndahva.

47 Ta tatu noo chiti nuu sanacavá chuun nu cuatyí, vaha taxin ca tava. Vatyí vaha ca cha quihvun nu nyacá ñaha Nyoo chihin noo chiti nuu ta ñima ca chihin ninduvi chiti nuun ta tuchi Nyoo chuun anyaya.

48 Vatyí yucuan ña chihí tindacu chachí chi ñu, ta ni noo chaha ña ndahva ñuhú.

49 Soco tandihí ñu nyicon chii, tari cha cayú ñu chihin ñuhú tatu nyehe ñu tindoho cha cuende, vatyí chihin cuan cua sanduvaha Nyoo chi ñu, tari nduvaha nyayu chihin ñi.

50 Ñi vaha xaan. Soco tatu ndihí cha uhva, ¿yoso caa cuví cotyiño yo inga chaha? Tyicuan caa tucu nyoho, ma sandihí ndo cha coo tuhun Nyoo añima ndo cha cuví tari ñi vaha. Tyicuan caa ta coo taxi ri ndo chihin tahan ndo.

Nu sañahá ra Jesús tyi ña vaha sandoo ray# chi ñasihi ra
(Mt. 19.1-12; Lc. 16.18)

¹ Quita ra Jesús Capernaum ta cuahan ra ityi Judea nya inga chiyo yutya Jordán. Yucuan candu in ri ñáyivi inga chaha nu nyaá ra, ta quichaha sañaha tucu ra chi ñu tari tuhvá maa ra.

² Tyicuan ta suhva ra fariseo catuhva ra nu nyaá ra Jesús, vatyí nducu ra cuhva tyaa ra cuatyí siqui ra. Ta candaca tuhun ra chi ra tatu vaha cha sandoo noo ray# chi ñasihi ra.

³ Tyicuan ta nacahan ra Jesús ta catyí ra:

—¿Ñáá cha catyí ra Moisés tyi sacuvi ndo?

⁴ Ta canacahan ra ta cacatyí ra:

—Ra Moisés chaha ra cha cuví cahnya noo ra tutu cha tandaha ra tyicuan ta cuvi sandoo ra chi ñasihi ra —catyí ra chi ra.

⁵ Tyicuan ta catyí ra Jesús chi ra:

—Catyí ra Moisés cha sacuvi ndo tyicuan caa soco cha cuenda cha ndava añima ndo.

⁶ Soco quivi xihna ri, quivi savaha Nyoo tandihi maa, savaha ra ray# ta ñaha sihi.

⁷ “Yucuan cuenda sandoó ray# chi sutu ra ta chi sihi ra vatyí ndu in ri ra chihin ñasihi ra.

⁸ Ta chichi cha ninduvi tahan ñu cucuvi ñu tari cha noo ri ñáyivi.” Yucuan chaha ñima ca uvi tahan cuví ñu, soco cha nanduvi ñu noo ri ñáyivi.

⁹ Yucuan chaha, ña tahan chi cha sasín ñáyivi cha sandu in ri Nyoo —catyí ra Jesús chi ra.

¹⁰ Yahá cuan ta nachaa coyo ra nya vehe, ta quichaha ndaca tuhun ra cachicá noo chihin ra inga chaha siqui tuhun cuan.

¹¹ Ta catyí ra Jesús chi ra:

—Ra cha sandoó ñasihi ta tandaha ra chihin inga ñu, chicoó cuatyí ra vatyí ña vaha sacuvi ra chihin ñasihi ra, ñaha cha xihna ri cuan.

¹² Ta tyicuan caa tucu ñusihi. Tatu sandoó ñu chi yí ñu ta tandaha ñu chihin inga ra suri chicoo tucu cuatyí ñu —catyí ra Jesús.

*Nu nasoco ra Jesús chi ra cuatyaa
(Mt. 19.13-15; Lc. 18.15-17)*

¹³ Tyicuan ta quichi nyaca ñu suhva ra cuatyaa chi ra Jesús tacuhva natyiso ra ndaha ra siqui ndotyín. Soco ra cachicá noo chihin ra ña chahá ca ra cha quichi nyaca ñu chi ndotyín.

¹⁴ Soco cuhva cha nanyehe ra Jesús, cuxaan ra. Ta catyí ra chi ra:

—Saña ndo. Na quichi nyaca ñu chi ra cuatyaa nu nyaí. Ta ma casi ndo. Vatyí ñu nyacá ñaha Nyoo añima, cuví ñu chinó iñi chi Nyoo tari chinó iñi ra cuatyaa ihya.

¹⁵ Cha ndicha catyí chi ndo vatyí tatu ma nacuhva cuenda ndo chi ndo chi Nyoo tari noo ra cuatyaa chihin sutu ndotyín, ma cuvi quihvi ndo nu nyacá ñaha Nyoo —catyí ra Jesús chi ra.

¹⁶ Ta quehen ra chi noo noo ndotyín ta tyihí sucun ndaha ra. Ta tyiso ra ndaha ra siqui ndotyín, ta chican tahvi ra chaha ndotyín.

*Nu ndatuhún minoo ra tyivaa tyayí chihin ra Jesús
(Mt. 19.16-30; Lc. 18.18-30)*

¹⁷ Yahá cuan ta cuahan ra Jesús. Ta chingo vavaha noo ra cuan chata ra ta chicuiñi chiti ra nuu ra, ta ndaca tuhun ra chi ra, ta catyí ra:

—Maestro, ra vaha cuvún. ¿Yoso caa sacuvi ta ñihi ñayivi cha ma naa ca maa coi? —catyí ra chi ra Jesús.

18 Ta catyí ra Jesús chi ra:

—¿Yoso caa chitón tyi vahi? Noo ri ra vaha iyó, ta ican ra cuan cuví Nyoo. (Ta cha catyún tyi vahi, nacotón tyi Nyoo cuví.)

19 Yoho cha chitón cha catyí Nyoo cha sacuvi yo: “Ma coun chihin inga ñusihi tatu ñima ñasihun cuví. Ma cahñun. Ma suhun. Ma cahun cuendu siqui ni noo ñu. Ma sandavi ñahun. Sahun ñáyivi chí sutun ta chi sihun” —catyí ra Jesús chi ra.

20 Ta nacahan ra cuan ta catyí ra:

—Maestro, tandihi ihya cha sacuví nyata luhli —catyí ra.

21 Tyicuan ta cusii cuñí ra Jesús nanyehé ra chi ra. Ta catyí ra chi ra:

—Cumañi noo ri ca cha cumañi chuun. Cuahan ta xicon tandihi cha iyó chuun ta cuhvon chi ñu ndahvi. Tyicuan ta coo cha tyayiiun nya andivi. Yaha cuan ta quichun cunyicon chii vasi nyehún tindoho —catyí ra Jesús chi ra.

22 Soco cha chiñi ra tuhun cahan ra Jesús tyehe caa, nducuihya iñi ra, ta cuihya xaan cuanuhu ra vatyí tyayii xaan ra.

23 Tyicuan ta nanyehé ra Jesús nicachico chata ra, ta catyí ra chi ra cachicá noo chihin ra:

—¡Ñana cha yii ta cuvi nacuhva cuenda ñu tyayii chi ñu na cunyaca ñaha Nyoo chi ñu! —catyí ra chi ra.

24 Iyo cacuñi ra cachicá noo chihin ra tuhun cahán ra. Soco catyí ra Jesús chi ra inga chaha:

—Sehi, ñu cha tyaa xaan xiñi cha tyayii, ¡yii xaan quihvi ñu nu nyacá ñaha Nyoo!

²⁵ Tañi tyehe yaha noo camellu xiu noo yiqui ticu, ta ñima ca cha cuhva noo ñu tyayii cunyacá ñaha Nyoo chi ñu —catyí ra Jesús.

²⁶ Cha cachiñi ra tuhun ihya, iyo xaan cacuñi ra, ta candacā tuhun ra chi ra tahan ra, ta catyí ra:
—Tu tyicuan caa, ¿yóo cha cuví cacu añima?
—catyí ra.

²⁷ Nanyehē ra Jesús chi ra ta catyí ra chi ra:
—Ñáyivi ña cuví sacuvi ñu ihya. Soco Nyoo cuví chi ra. Vatyí cha cuenda Nyoo ñahri cha yii sacuvi ra.

²⁸ Tyicuan ta catyí ra Pedro chi ra:
—Sutu Mañi yuhu, nyuhu sandoo ndi tandihi cha iyó chi ndi, ta vityin nyicón ndi chuun.

²⁹ Nacahan ra Jesús ta catyí ra:
—Cha ndicha catyí chi ndo vatyí tandihi ñu sandoo vehe, o yañi, o cuhva, o sutu, o sihi, o ñasihí, o sehe, o ñuhú, cha cuenda yuhu ta cha cuenda cha sacoto ñu chi ñáyivi tyi cuñi Nyoo sacacu ra chi ñu,

³⁰ cuañihi ñu ciento chaha siqui cha sandoo ñu ihya ñuhu ñáyivi. Cuañihi ñu vehe ta yañi ñu, ta cuhva ñu, ta sihi ñu, ta sehe ñu, ta ñuhú, vasi sanyehe ñáyivi tindoho chi ñu. Soco inga ñáyivi cha vachi, cuñihi ñu ñáyivi cha ma naa ca maa.

³¹ Soco cuaha xaan ñu cha cuvi nuu vityin, ñu nu ndihi cucuvi ñu. Ta cuaha xaan ñu cuví ñu nu ndihi vityin, ican ñu cucuvi nuu —catyí ra Jesús.

*Nu cahán ra Jesús inga chaha tyi cucúvi ra
(Mt. 20.17-19; Lc. 18.31-34)*

³² Cuahan coyo ra ndaa ra ityi cuahan ñuu Jerusalén, ta ra Jesús cuahan ra ityi nuu ñu nyicón chi ra. Ta maa ñu iyo cuñí ñu ta chihin cha yuhví ñu cuahan coyo ñu chata ra. Tyicuan ta cana sijn ra chi ndi uchi uvi ra cachicá noo chihin ra. Ta quichahā catyí ra cha cucuvi chi ra.

³³ Ta catyí ra:

—Tari cuhva nyehé ndo vityin, cua ndaa yo ityi cuahan ñuu Jerusalén nu cucuhva cuenda ñu chi yuhu Rayi cha quichi nya gloria chi ra cuví nuu chi tata sutu, ta chi ra sacuahá cuenda ley vehe ñuhu. Ta cucatyí ra tyi cucúvi ta cucuhva cuenda ra chii chi ra inga ñuu.

³⁴ Ta cucuacu nyaa ra chii, cucañi ra chii, cutyicu sii ra chii. Ta cucahñi ra chii. Soco cha cu uñi quivi cunandote cha yaha cúvi —catyí ra Jesús.

Nu cachican ra Jacobo ta ra Juan noo tumañi iñi chi ra Jesús

(Mt. 20.20-28)

³⁵ Tyicuan ta ra Jacobo ta ra Juan, ra cacuví sehe ra Zebedeo, catuhvā ra nu nyaá ra Jesús, ta catyí ra chi ra:

—Maestro, cuñí ndi cha sahun noo tumañi iñi chi ndi —catyí ra.

³⁶ Ta ndaca tuhun ra Jesús chi ra:

—¿Ñáá cha cuñí ndo cha sacuvi cha cuenda ndo?

³⁷ Ta canacahan ra ta catyí ra:

—Cuhva cha cunyaa ndi chuhun nu nyacá ñahun, noo ndi chiyo vahun, ta inga ndi chiyo satyun —catyí ra chi ra Jesús.

38 Tyicuan ta catyí ra Jesús chi ra:

—Nyoho ña chitó ndo cha chicán ndo. ¿Atu cuví nyehe nyoho tındoho cha cuanyehe yuhu? ¿Atu cuví cuhun ndo tuhun chihi tari cuhun yuhu?

—catyí ra chi ra.

39 Ta canacahan ra:

—Cuví chi ndi.

Ta ra Jesús catyí ra:

—Cha ndicha vatyí cunyehe ndo tındoho ta cuhun ndo tuhun chihi tari cuhun yuhu.

40 Soco tuhun cha cunyaa ndo chiyo vahi ta chiyo satyin, ñima yuhu tahán chi cuhve chi ndo, soco maa Nyoo cucatyí yóo cha cuñihi nyatu cuan —catyí ra Jesús chi ra.

41 Cha cachiñi uchi ca tahan ra chicá noo chihin ra Jesús tuhun cuan, cacuxaan ra chihin ra Jacobo ta ra Juan.

42 Soco cana ra Jesús chi ra ta catyí ra chi ra:

—Chitó nyoho vatyí ra canyacá ñaha chi ñáyivi siqui ñuhu ñáyivi, ñihi xaan yosó ra siqui ñu.

43 Soco ñima tyicuan caa tahán chi sacuvi nyoho. Vatyí ra cuñi cucahnu ca, cuñi chi cuvi ra musu tandihi ca ndo.

44 Ta nya nyoho cha cuñi ndo cuví ndo nuu, cuñi chi cuvi ndo musu tandihi ca ñu.

45 Vatyí ni ri yuhu Rayi cha quichi nya gloria ta ña vachi vatyí sacuvi ñáyivi tyiño nui. Soco vachi vatyí sacuvi tyiño nuu ndo. Ta vachi vatyí cuhve ñáyivi tari noo cha cutyiyahvi ta cusacaqui cuaha ñáyivi —catyí ra Jesús.

Nu sanduvaha ra Jesús chi ra Bartimeo ra cha cuaa (Mt. 20.29-34; Lc. 18.35-43)

46 Tyicuan ta cachaa coyo ra ñuu Jericó. Ta cua yaha ri ra ñuu cuan. Ta cuhva cha quita ra Jesús ñuu cuan cuaha xaan ñáyivi cuahan chata ra, in ri chihin ra cachicá noo chihin ra. Ta yucuan nyaá noo ra cuaa cha nañi Bartimeo. Sehe ra Timeo cuví chi ra. Nyaá ra cuan yatyin ri yuhu ityi cuan, chicán ra caridaa.

47 Ta cha chiñi ra cuaa cuan tyi cua yaha ra Jesús ra ñuu Nazaret, quichaha cana chaa ra, ta catyí ra:

—¡Yoho Jesús, ra vachi tata ra David, cundahvi cuñi chii! —catyí ra canachaá ra.

48 Cuaha ñu chasi yuhu ra na cutaxin ra, soco maa ra ñihi ca cana chaa ra ta catyí ra:

—¡Yoho ra vachi tata ra David, cundahvi cuñi chii! —catyí ra.

49 Tyicuan ta chicuiñi ra Jesús ta catyí ra:

—Cana ndo chi ra.

Ta cacana ra chi ra cuaa cuan ta catyí ra chi ra:

—Sanii iñun. Ndücüita, vatyí caná ra chuun —cacatyí ra chi ra.

50 Tyicuan ta tuchi ñihno ra sahma ndichi ra. Ta ndava ra noo ta tuhva ra nuu nyaá ra Jesús.

51 Tyicuan ta quichaha ndaca tuhun ra Jesús chi ra:

—¿Ñáa cha cuñun cha sacuvi chuhun?

Ta nacañan ra cuaa cuan ta catyí ra:

—Maestro, cuñi cha sanduvahun chiti nui —catyí ra.

52 Ta catyí ra Jesús chi ra:

—Cuñan. Cha nduvahun vatyí chinó iñun chii.

Ta caa cuhva ri cuan cuví nanyehe ra cuaa cuan. Ta cuahan ra chata ra Jesús ityi cuahan ra.

11

*Nu quihvi ra Jesús ñuu Jerusalén
(Mt. 21.1-11; Lc. 19.28-40; Jn. 12.12-19)*

¹ Cachaa coyo ra yatyin ri ñuu Jerusalén, nu nyaá ñuu Betfagé ta ñuu Betania. Ta yucu yutun Olivo nyaá ityi nuu chiin ca. Tyicuan ta catyí ra Jesús chi uvi ra chicá noo chihin ra:

² —Cuahan ndo chichi ñuu cha nyaá ityi nuu chiña. Ta nu cua chaa ndo cunañihi ndo noo burru chaa nuhñí ti, quiiti ta quihi ca tyayu cuví ti. Ndachi ndo chi ti, ta quichi nyaca ndo chi ti.

³ Ta tatu yóo cha ndaca tuhun ñáá tuhun sacuví ndo tyicuan caa, catyi ndo chi ñu vatyí chiñuhú ti chi ra nyacá ñaha, ta numi ri cunanyaca ndo chi ti, catyi ndo chi ñu —catyí ra Jesús chi ra.

⁴ Tyicuan ta cuahan coyo ra, ta canañihí ra burru cuan nuhñí ti ityi cahnu yatyin ri noo yuvehe, ta candachí ra chi ti.

⁵ Ta suhva ra canyicú cuan catyí ra chi ra:
—¿Ñáá cha nyacuvi ndo? ¿Ñáá tuhun cha ndachí ndo burru chiña? —catyí ra chi ra.

⁶ Tyicuan ta canacahan ra tari cuhva cha catyi ra Jesús chi ra. Ta cachaha ra cuhun coyo ra.

⁷ Tyicuan ta caquehen ra burru cuan ta chinyaca ra chi ra Jesús. Ta catyiso ra sahma ra siqui ti, ta ndaa ra Jesús chi ti.

⁸ Ta cuaha ñu ndica ñu sahma ñu ityi cuahan ra, ta inga ñu chahnu ñu soco numa ta cachacun ñu.

⁹ Tyicuan ta ñu cha cuahan ityi nuu ra ta ñu cha cuahan ityi chata, quichaha cana chaa ñu ta catyí ñu:

—¡Cahnu xaan cuví Nyoo! ¡Na sacahnu yo chi ra vachi cuenda Sutu yo Nyoo!

¹⁰ ¡Sacahnu yo chi ra vachi nyacá ñaha tari chinyacá ñaha sutu chahnu yo ra David! ¡Cahnu xaan ca cuví ra nyaá andiví! —catyí ñu.

¹¹ Tyicuan ta quihví ra Jesús chichi ñuu Jerusalén, ta cuahan ra vehe ñuhu cahnu. Ta cha yahá nanyehé ra ityi cuan ityi ihya, ndacá chata ra ñuu Betania chihin ndi uchi uvi ra chicá noo chihin ra vatyí cha iñi.

Nu soco ra Jesús chi yutun higo cha ñahri chiti iñi nuu tun
(Mt. 21.18-19)

¹² Cha inga quiví quita coyo ra ñuu Betania cuan, ta cha ni ri ca cha cuahan ra chicá ityi ra chaá noo soco chi ra Jesús.

¹³ Ta nyasava ri nanyehé ra noo tu higo cha nyaá numa. Ta chahan ra chinyehé ra tatu iñi chiti nuu tun, soco maa maa ri numa ri iñi, vatyí ta cha ca quiví quita chiti tun.

¹⁴ Tyicuan ta cahán ra Jesús chihin tun, ta catyí ra chi tun tyehe caa:

—Ma coo ca chiti cachi ñáyiví nuun —catyí ra chi tun.

Ta ra cachicá noo chihin ra cachiñí ra cha cahán ra.

Nu tava ñehe ra Jesús chi ra caxicó chichi vehe ñuhu cahnu
(Mt. 21.12-17; Lc. 19.45-48; Jn. 2.13-22)

¹⁵ Yahá cuan ta nachaa coyo ra Jerusalén. Ta quihví tucu ra Jesús chichi vehe ñuhu cahnu. Ta quichahá tava ñehe ra chi ra caxicó ta ra casatá yucuan. Sanduva ra mesa ñu canasamá xuhun

chi ñáyiví. Ta suri tyicuan caa sacuví ra chihin tyayu ra caxicó paloma.

¹⁶ Ta ña chahá ca ra ca cuiso ñu ñáá cha cuiso ñu ityi chichi vehe ñuhu cuan.

¹⁷ Ta quichaha sañahá ra chi ñu, ta catyí ra:

—Nu tutu Nyoo catyí chi: “Vehi, vehe nu chicán tahvi tandihí ñáyiví iyó siqui ñuhu ñáyiví cuví”, catyí Nyoo. ¡Soco nyoho nasahá ndo vehe nu nyicú ra suhu! —catyí ra Jesús.

¹⁸ Ta ra cacuví nuu chi tata sutu ta ra casacuahá cuenda ley vehe ñuhu cachiñi ra cha cahán ra, ta quichaha canducu ra cuhva cha cacahñi ra chi ra vatyí cayuhví ra chi ra tyi cha tandihí ñáyiví iyo cuñí ñu cha sañahá ra.

¹⁹ Soco cuhva cha cua cuaa ra Jesús quitá ri ra ñuu cuan chihin ra cachicá noo chihin ra.

Nu na ityi tu higo cha soco ra Jesús (Mt. 21.20-22)

²⁰ Cha ñaha ri cha inga quiví cuan, nayahá coyo ra nu nanyaá tu higo cuan. Ta cananyehé ra vatyí na ityi nyacua nya yoho tun.

²¹ Tyicuan ta nicohon iñi ra Pedro vatyí soco ra Jesús chi tun ta catyí ra chi ra Jesús:

—Maestro, nyehé tu higo cha socon, cha na ityi tun —catyí ra.

²² Nacahan ra Jesús, ta catyí ra:

—Chino iñi ndo chi Nyoo.

²³ Vatyí cha ndicha catyí chi ndo vatyí nya nyoho catyí ndo chi yucu ihya, “Na canyaha ta cuhun nu tyañuhu”, ta tatu ña chicá uvi iñi ndo, ta chinó iñi ndo, tuhun cahan ndo cua cuvi.

²⁴ Yucuan chaha catyí chi ndo vatyí tandihí cha chicán tahvi ndo, ta tatu chinó iñi ndo tyi cha naquehen ndo, tyicuan caa cucuvi.

²⁵ Ta tatu chicán tahvi ndo chi Nyoo ta cuxaán ndo chi inga ñu, saha ndo ticahnu iñi chi ñu, tacuhva vatyí Sutu ndo, ra nyaá andivi, saha tucu maa ra ticahnu iñi cuatyí ndo.

²⁶ Soco tatu ña sahá ndo ticahnu iñi chi ñu, ni ri Sutu ndo, ra nyaá andivi, ma saha ra ticahnu iñi cuatyí maa ndo.

Yóo cha chahá ityi chi ra Jesús vatyí sacuvi ra cha sacuví ra
(Mt. 21.23-27; Lc. 20.1-8)

²⁷ Tyicuan ta nachaꞗ coyo ra Jerusalén. Ta cha niri ca cha chicá noo ra Jesús chichi vehe ñuhu cahnu cuan, catuhvꞗ ra cacuví nuu chi tata sutu, ta ra sacuahá cuenda ley, ta ra cacuví mandoñi nu nyaá ra.

²⁸ Ta candacaꞗ tuhun ra chi ra.

—¿Yóo cha tyaꞗ tyiño chuun vatyí sacuvun tyehe caa? ¿Yóo cha chahá ityi chuun vatyí sacuvun? —cacatyí ra.

²⁹⁻³⁰ Ta nacahan ra Jesús, ta catyí ra:

—Cua ndaca tuhun tucu yuhu noo tuhun chi ndo. ¿Yóo cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi? Tatu catyí ndo chii, tyicuan ta cua catyí tucu yuhu chi ndo yóo cha tyatyíño ihya chii —catyí ra Jesús chi ra.

³¹ Tyicuan ta quichaha cacuvi yuhu maa ra chihin tahan ra ta cacatyí ra:

—Tatu catyi yo tyi Nyoo tach̄i chi ra Juan, cucatyi ra chi yo: “Tu tyicuan caa, ¿ñáá tuhun ña chinq̄ iñi ndo chi ra?”

³² ¿Ta yoso caa catyi yo tyi ñáyiv̄i tach̄i chi ra? Ma cuvi —cacatyí ra, vatyí cayuhví ra chi ñáyiv̄i, vatyí tandih̄i ñu cachinó iñi ñu vatyí cha ndicha cuenda Nyoo cahan ra Juan.

³³ Tyicuan ta quichaha cacatyí ra chi ra Jesús:

—Ña chitó ndi.

Tyicuan ta ra Jesús catyí ra chi ra:

—Ni yuhu ma catyi chi ndo yóo cha tyaa tyiño chii tyi sacuvi cha sacuví —catyí ra Jesús chi ra.

12

Nu chah̄a ra Jesús noo cuhva yoso caa cucah̄ni ñu chi ra

(Mt. 21.33-46; Lc. 20.9-19)

¹ Tyicuan ta chihin cuhva ihya quichaha cahan ra Jesús chihin ra, ta catyí ra chi ra:

—Chiyó noo ra cha tach̄i ra yoho tichaha ndiv̄i. Ta chas̄i ra chaha. Ta savah̄a ra noo nu cuh̄ni ra tichaha ndiv̄i. Ta savah̄a ra noo vehe sucun tacuhva vatyí cuví saha ra cuenda tandih̄i.

Yah̄a cuan ta chah̄a noo ra ñuhú cuan chi suhva ra casahá tyiño. Ta cuahan ra inga ñuu.

² Ta cha chāa quiv̄i iyó ch̄iti yoho cuan, chitoho ñuhú cuan tach̄i ra noo musu nu nyicú ra casahá tyiño cuan vatyí cacan ra suhva ch̄iti cha tahán chi chi ra.

³ Soco cat̄in ra chi ra. Ta cacañi ra chi ra. Ta canatach̄i ra chi ra chihin nu ndaha nu ndih̄i ra.

⁴ Tyicuan ta chitoho ñuhú cuan tach̄i ra chi inga musu, soco chi ra ihya catuch̄i ra yuu chi ra, catahv̄i ra xiñi ra, ta cacahan uhv̄i ra chi ra.

⁵ Ta inga tucu musu tach̄i chitoho ñuhú cuan. Ta chi ra cuan cachahñi ra. Yah̄a cuan ta tach̄i ra cuaha ca ra. Soco cacañi ra chi suhva ra. Ta chi suhva ca ra cachahñi ra.

⁶ Ta ndoo noo ri ca ra cha cuv̄i tachi chitoho ñuhú cuan. Ican cuv̄i sehe ra cha cuñi xaan ra. Ta nu ndih̄i tach̄i ra chi sehe ra vatyi cuñi maa ra chicá xiñi ra: “Cucasaha ra ñáyiv̄i chi sehi”, cuñi ra chicá xiñi ra.

⁷ Soco nu chāa sehe ra, ra casahá tyiño cuan catyi ra chi tahan ra: “Ican ra ihya cundoo chihin tandih̄i ihya. Na cahñi yo chi ra, ta ndoo maa yo chihin”, catyi ra.

⁸ Ta tyicuan caa catiñ ra chi ra ta cachahñi ra chi ra. Tyicuan ta cachituch̄i ra coño ñuhu ra ityi chata chacu cuan —tyicuan caa cuhva cahan ra Jesús chihin ra cuan.

⁹ Tyicuan ta ndac̄a tuhun ra Jesús chi ra ta catyi ra:

—¿Ñáá cha cusacuvi ra cuv̄i chitoho ñuhú cuan? Cuquichi ra ta cucahñi ra chi ra casahá tyiño cuan. Ta cuhva ra ñuhú cuan chi inga ra.

¹⁰ ¿Atu ta sacuaha ca nyoho nu tutu Nyoo nu catyi chi tyehe caa?

Yuu cha ña cacuñi ra casavaha vehe cotyiño ra, ican cuan cuv̄i yuu cha niñi ca.

¹¹ Ican ihya cuv̄i cha sacuvi Sut̄u yo Nyoo.

Ta tyaqui xaan tuhun cha cuenda chi yo, catyi chi nu tutu Nyoo —catyi ra Jesús chi ra cacuvi nuu chi tata sutu cuan.

¹² Tyicuan ta canducu ra cuhva cha tyihi ra chi ra Jesús vehe caa vatyí cachitó ra vatyí cahán ra cuhva ihya soco cha cuenda maa ra. Soco vatyí cayuhví ra chi ñáyiví, casandoq ra chi ra, ta cuahan coyo ra.

Nu ndacq̄ tuhun ra chi ra Jesús cha cuenda xuhun cha tavá gobiernu ñuu Roma (Mt. 22.15-22; Lc. 20.20-26)

¹³ Tyicuan ta catachí ra suhva ra cuenda ra Herodes ta suhva ra fariseo nu nyaá ra Jesús vatyí casacahan ra chi ra ta coo cuatyí catyaa ra siquí ra.

¹⁴ Chaq̄ coyo ra ihya ta quichaha catyí ra chi ra Jesús:

—Maestro, chitó ndi vatyí cahún cha ndicha, ta ña quichahún cha cahán ñáyiví, ta ña natín cuendon cuhva caa ri ñu. Ta ndicha sañahún ityi Nyoo. Yucuan chaha cuñí ndi coto ndi, ¿atu vaha cha tyiyahvi yo cha chicán gobiernu ñuu Roma chi yo, o ña vaha? ¿Atu tahán chi cha tyiyahvi yo, o ña tahán chi? —cacatyí ra chi ra Jesús.

¹⁵ Soco ra Jesús chitó ra vatyí ñima cha vaha chicá xiñi ra, ta catyí ra chi ra:

—¿Ñáá tuhun cha cuñí ndo sandavi ñaha ndo chii? Nyaca ndo noo xuhun chii, na nyehi —catyí ra.

¹⁶ Caquichí nyaca ra chi ra. Ta cuhva cha nanyehē ra ta ndacq̄ tuhun ra chi ra, ta catyí ra:

—¿Yóó chi nuu ihya, ta yóó chi siví nyaá ihya? —catyí ra chi ra.

Ta canacahan ra ta cacatyí ra:

—Chi gobiernu.

17 Tyicuan ta catyí ra Jesús chi ra:

—Cuhva ndo chi gobiernu cha tahán chi chi ra.
Ta cuhva tucu ndo chi Nyoo cha tahán chi Nyoo
—catyí ra Jesús chi ra.

Ta iyo cacuñí ra tuhun cha nacahan ra.

*Nu canducu tuhun ra saduceo siqui tuhun cha
nandotó ndiyi*

(Mt. 22.23-33; Lc. 20.27-40)

18 Tyicuan ta cuahan coyo suhva ra saduceo nu
nyaá ra Jesús. Ican ra saduceo ihya catyí ra vatyí
ña nandotó ndiyi. Yucuan chaha cacahan ra
tyehe caa ta catyí ra chi ra Jesús:

19 —Maestro, tyaa ra Moisés tuhun yoso caa
tahán chi sacuvi yo tatu noo rayi ta chihí ra ta
ndoq ñasihí ra soco ña chicoq sehe ra chihin ña.
Catyí ra vatyí tahán chi tandaha yañi ra chihin
ñaha cha chihí yí cuan, tacuhva vatyí coo sehe ña
cha cuenda ndi yañi ra.

20 Noo chaha chiyo ucha tahan ra chihin yañi
ra. Ra cha xihna ri tandaha ra chihin noo ña, ta
yori sehe ra chicoq.

21 Ta ra cu uvi tandaha ra chihin ñaha cha ndoq
cuan. Ta suri chihí ra. Ta suri yori sehe ra chicoq.
Ta tyicuan caa tucu cuví chihin ra cu uñi cuan.

22 Ta tyicuan caa ndi ucha tahan ra tandaha
chihin ña. Ta ni noo ra ña cachiyó sehe ra chihin
ña. Ta nu ndihí tuhun, chihí ndihí maa ña.

23 Ta vityin, quivi cunandoto ñáyivi, ¿nya ra
cucuvi yí ña? Vatyí ndi ucha tahan ra cuan chiyo
chihin ña —cacatyí ra chi ra Jesús.

24 Tyicuan ta nacahan ra Jesús ta catyí ra chi ra:

—Nyoho cahán tondo ri maa ndo, vatyí ña chitó ndo cha nyaá nu tutu tuhun Nyoo. Ta ni ña chitó ndo yoso caa tunyee iñi Nyoo.

²⁵ Vatyí quiví cunandoto ndiyí, ni ma tandaha ñu ta ni ma cuhva ñu sehe ñu tandaha, vatyí tari ángel cha nyaá andiví tyicuan caa cucuvi ñu.

²⁶ Ta tuhun cha nandotó ndiyí cuan, ¿atu ta sacuahá ca ndo nu libru ra Moisés yoso caa cahan Nyoo chihin ra nu cayú taca iñu cuan? Ta tyehe caa catyí ra chi ra: “Yuhu cuví Nyoo cuenda ra Abraham, ta cuenda ra Isaac, ta cuenda ra Jacob”, catyí Nyoo chi ra Moisés.

²⁷ Ta cha catyí Nyoo tyicuan caa cuñí chi catyí vatyí vasi cha naha cachihí ra, soco canyitó añima ra vatyí Nyoo ñima Nyoo cuenda ñu ndiyí cuví ra, soco Nyoo cuenda ñu nyitó cuví ra. Yucuan chaha catyí vatyí nyoho cahán tondo ri ndo —catyí ra Jesús chi ra.

Ley cha niñi ca cha chaha Nyoo (Mt. 22.34-40)

²⁸ Chaq tucu noo ra sacuahá cuenda ley vehe ñuhu cuan, ta chiñi ra cacuví yuhu ra. Ta vatyí chitó ra vatyí ra Jesús vaha nacahan ra nu cacahan ra yucuan, ta ndaca tuhun ra chi ra ta catyí ra:

—Chichi cha tandihí ley, ¿nya cha niñi ca sacuvi yo? —catyí ra.

²⁹ Ta nacahan ra Jesús ta catyí ra:

—Cha xihna ca sacuví yo cha nuu tandihí, ican cuví ihya: “Cuiñi ndo ñu Israel. Sutu yo Nyoo, noo ri maa ra iyó.

³⁰ Cuñun chi Sutu yo Nyoo chihin cha n̄i iñun ta chihin cha tandih̄i añimon, ta chihin cha tandih̄i cha chiñi tuñi xiñun, ta chihin cha tandih̄i tunyee iñun.” Ican ihya cuví cha xihna ca cha tahán chi sacuvi yo.

³¹ Ta cha cu uvi catyí chi: “Cuñun chi tahun tari cuñún chi maun.” Ñahri ca tuhun cha niñi ca ican saha nduvi tahan ihya —catyí ra Jesús.

³² Tyicuan ta ra sacuahá cuenda ley cuan catyí ra chi ra:

—Vaha xaan nacahun, Maestro. Ndicha cha catyún vatyí noo ri Nyoo iyó, ta yori ca Nyoo iyó, noo tuhun ri maa ra.

³³ Ta cha cuñí yo chi Nyoo chihin cha n̄i iñi yo ta chihin cha tandih̄i cha chiñi tuñi xiñi yo, ta chihin cha tandih̄i añima yo, ta chihin cha tandih̄i fuerza yo, ta cuñi yo chi tahan yo tari cha cuñi yo chi maa yo, vale ca cuan ta ñima ca tandih̄i quit̄i cha chahá yo chi Nyoo cha chahñi yo ta chahm̄i yo —catyí ra sacuaha cuenda ley cuan chi ra Jesús.

³⁴ Nyehe ra Jesús vatyí vaha nacahan ra chihin cha cachi xiñi ra. Ta catyí ra chi ra:

—Chiin ri ca cuñí chi ta ñihún cuhva yoso caa nacuhvon añimon chi Nyoo na cunyaca ñaha ra —catyí ra Jesús chi ra.

Ta ni noo ca ñu ña cañá ca iñi ñu candaca tuhun ñu ñáa cha ndaca tuhun ñu chi ra Jesús.

*¿Yóo chi tata vachi ra Cristo?
(Mt. 22.41-46; Lc. 20.41-44)*

³⁵ Sañahá ra Jesús chichi vehe ñuhu cahnu, ta catyí ra:

—¿Yoso caa cha cacatyí ra sacuahá cuenda ley vehe ñuhu vatyí ra Cristo vachi ra tata ra David?

³⁶ Vatyí suri maa ra David chotyíño Tatyí Ii chi ra ta catyí ra:

Cahan Suti Nyoo chihin Suti ra Cristo, ta catyí ra: “Cunyataa chiyo vahi nyacua nya cuhve chi ra xaan iñi chuun vatyí cuaca chahun siqui ra”, catyí Nyoo chihin yuhu ra David ta cha naha.

³⁷ ¿Yoso caa cha ra vachi tata ra David cuví chi ra Cristo, ta suri maa ra David catyí ra vatyí ra Cristo cuví Sutu ra? —catyí ra Jesús.

Ta cuaha xaan ñáyivi nyicú yucuan sii xaan cacuñí ñu chiñí ñu tuhun cahan ra.

Nu catyí ra Jesús vatyí iyó cuatyí ra casacuahá cuenda ley vehe ñuhu

(Mt. 23.1-36; Lc. 11.37-54; 20.45-47)

³⁸ Nu sañahá ra Jesús ta catyí ra tyehe caa:

—Saha ndo cuenda chi ndo chihin ra casacuahá cuenda ley vehe ñuhu, vatyí tahan iñi ra cacuihno ra sahma nañi ta chicá noo ra nuyahvi tacuhva saha ndo ñáyivi chi ra, ta cuhva ndo nocumi chi ra.

³⁹ Maa ra cananducú ra nu vaha ca cunyicu ra chichi vehe ñuhu. Ta nu vaha ca cacuñí ra cachi ra nyayu nu iyó vico.

⁴⁰ Ta ican ra catinyaá vehe ñu chihí yii, vatyí ña cuví tyiyahvi ñu ñáá xuhun tava ra siqui ñu. Ta cuñí ra sacuvaha ra chi ra nuu ñáyivi. Yucuan chaha naha chicán tahvi ra nu tuvi. Maa ra cuví cha cutachi tuñi ca Nyoo chii —catyí ra Jesús.

Noo cha chahá noo ñaha chihí yii

(Lc. 21.1-4)

⁴¹ Noo chaha nyaá ra Jesús chichi vehe ñuhu cahnu yatyin ri nu nyaá chatun nu cumí ñu xuhun cha chaha ñáyivi chi Nyoo. Ta nyehe ra yoso caa tyihí ñáyivi xuhun yucuan. Ta cuaha ñu tyayii chahá ñu cuaha xaan xuhun.

⁴² Tyicuan ta chaq tucu noo ñaha ndahvi chihí yii, ta tyihí ña uvi tahan xuhun cuatyí cha caha xaan nyaá.

⁴³ Tyicuan ta cana ra Jesús chi ra cachicá noo chihin ra, ta catyí ra chi ra:

—Cha ndicha catyí chi ndo vatyí ñaha ndahvi chihí yii ihya, cuaha ca chaha ña ta ñima ca inga ñu catyihí xuhun chiña.

⁴⁴ Vatyí tandihí ñu cachaha ñu cha ndoo ri ca chi ñu. Soco maa ña chihin cha ndahvi ña chaha ña tandihí cha cumí ña —catyí ra Jesús.

13

Nu catyí ra Jesús vatyí cutani vehe ñuhu cahnu (Mt. 24.1-2; Lc. 21.5-6)

¹ Cuhva cha cua quita ra Jesús chichi vehe ñuhu cahnu cuan, noo ra chicá noo chihin ra catyí ra chi ra:

—¡Maestro, nyehe ñana cha tyaqui yuu yihí vehe ihya! ¡Ñana cha nahnu vehe ihya! —catyí ra chi ra Jesús.

² Soco nacahan ra Jesús, ta catyí ra chi ra:

—¿Atu nyehún vehe nahnu ihya? Soco catyí chuun vatyí ma ndoo ni noo yuu coso siqui tahan, vatyí tandihí cutani —catyí ra Jesús.

Seña cha cucuvi cha ni cumañi ca naa ñayivi (Mt. 24.3-28; Lc. 21.7-24; 17.22-24)

³ Tyicuan ta cuahan coyo ra nya yucu yutun Olivo cha nyaá inga chiyo xahva ityi nuu vehe ñuhu cahnu. Ta cuhva cha nyaá ra Jesús yucuan, ra Pedro, ra Jacobo, ra Juan, ta ra Andrés candaca tuhun xehe ra chi ra:

⁴ —Cuñí ndi cha catyun chi ndi ama cucuvi tandihí tuhun cha cahun tuhun. ¿Ñáá seña cucuvi tatu cha cua cuvi? —cacatyí ra.

⁵ Nacahan ra Jesús ta catyí ra:

—Saha ndo cuenda chi ndo tacuhva yori sandavi ñaha chi ndo.

⁶ Vatyí cuaha xaan ra cuquichi coyo ra, ta cucotyíño ra sívi ta cucatyí ra: “Yuhu cuví ra Cristo.” Ta cusandavi ñaha ra chi cuaha xaan ñáyívi.

⁷ Soco tatu chiñí ndo tuhun tyi iyó cuatyí ta cañí tahan ñáyívi, ma nayuhvi ndo. Vatyí tyicuan caa tahán chi cucuvi, soco ta chaa ca quívi cunaa ñayívi.

⁸ Vatyí noo ñuu cucañi tahan chi chihin inga ñuu, ta ñáyívi cuenda noo gobiernu cucañi tahan ñu chihin ñáyívi cuenda inga gobiernu. Ta cucoo cha taan nahnu cuaha ri ityi. Ta cucoo tama. Ta cunaquiqui ñáyívi. Ta tyehe caa cua quichaha cha nyehe ñáyívi tindoho.

⁹ Soco saha ndo cuenda chi ndo. Vatyí cucuhva cuenda ñu chi ndo chi ra cacuví tyíño. Ta cucañi ñu chi ndo chichi vehe ñuhu. Cucuhva cuenda ñu chi ndo nuu gobernador ta nuu rey cha cuenda yuhu. Ta tyicuan caa cuví cahan ndo tuhun nuu ra.

¹⁰ Vatyí cha ni cumañi ca naa ñayívi, cuñí chi cucutya tuhun Nyoo yoso caa sacacú ra aña

ñáyivi tandihi ñuu.

¹¹ Ta cuhva cha cunyaca ñu chi ndo nuu ra cacuví tyiño, ma caca xiñi ndo ñáá tuhun cucahan ndo, ni ma ndichi xiñi ndo. Cahan ndo cha catyi Nyoo chi ndo cha cahan ndo cuhva cuan. Vatyí ñima nyoho cucahan, soco maa Tatyí Ii Nyoo.

¹² Yihí ra cunacuhva cuenda ra nyacua nya chi yañi maa maa ra. Ta sacuvi ra na cacahñi ñu chi ra. Ta yihí ñáyivi cunacuhva cuenda ñu chi sehe ñu. Ta yihí ñu cunaquiqui ñu siqui sutu ñu ta sihi ñu. Ta cunacuhva cuenda ñu chi ñu na cahñi ra chi ñu.

¹³ Tandihí ñáyivi cutasi cuñi nyehe ñu chi ndo cha cuenda yuhu. Soco tatu cunyeé iñi ndo nyacua nya nu ndihí, cucacu ndo.

¹⁴ Ra Daniel, ra profeta Nyoo ta cha naha, tyaa ra yoso caa cuahan tuhun noo cha cusacaquiñi nu ii xaan. Ta cusativi chi tandihí. Tatu nyehé ndo nanyaá yucuan nu ña tahán chi cuinanyaa, (nyoho cha sacuahá ndo ihya na cutuñi iñi ndo) cuñi chi cha cono tandihí ñu iyó Judea nya ityi yucu.

¹⁵ Ta ñu ñohó xiñi vehe quivi cuan, noo ñu, soco ma quihvi ñu chichi vehe ñu tava ñu ñáá cha tava ñu.

¹⁶ Ta ñu ñohó nu chiqui, ma cunuhu ñu nya vehe ñu cha cunaquehen ñu sahma ñu.

¹⁷ ¡Ndahvi ñusihí cha cañohó sehe quivi cuan!
¡Ndahvi tucu cuvi ñusihí cha chaxín sehe quivi cuan!

¹⁸ Cacan ndo chi Nyoo tacuhva cha ma tahan chi caca cono ndo quivi vichin.

¹⁹ Vatyí quivi tindocho cucuvi. Ta ni noo chaha

ta cuvi ca tyicuan caa nyata quiví chino ñuhu ñayiví nyacua nya vityin. Ta ni ma coo ca tindocho tahán ihya nu cuahan ca chi.

²⁰ Tyehe ta ma sanducuiti Sutu Mañi yo tyembu cuan, yori maa cucacu. Soco cusanducuiti ra cha cuenda cha cuñí ra chi ñu cuenda ra, ñu cha nacachi maa ra.

²¹ Tatu yóo cha catyí chi ndo: “Nyehe ndo, ma ra Cristo ihya” o “Nyehe, ma ra nyaá yucuan”, ma chino iñi ndo.

²² Vatyí cuquichi ra casandaví ñaha, cucatyí ra tyi ra Cristo cuví ra. Ta yihí ra cucatyí ra vatyí profeta Nyoo cacuví ra. Ta cucasavaha ra seña, milagru, vatyí canducú ra cuhva sandaví ñaha ra nyacua nya chi ñu cha nacachi maa Nyoo tatu cuví chi ra.

²³ Soco saha vaha ndo cuenda vatyí yuhu cha sacoté chi ndo cha ni cumañi ca cuvi tyicuan caa —catyí ra Jesús.

Nu sacoté ra Jesús yoso caa cuquichi tucu ra inga chaha

(Mt. 24.29-35, 42-44; Lc. 21.25-36)

²⁴ Ta catyí tucu ra Jesús tyehe caa:

—Soco quiví cha yaha tindocho, cunduñaa ñanyii. Ma cundichin ca yoo.

²⁵ Tiñoo cunacoyo andiví. Ta nyacua nya tandihí cha iyó andiví ta cunacanda.

²⁶ Tyicuan ta cunyehe ndo chi yuhu Rayii cha quichi nya gloria inga chaha, vachi nu vico chihin cha ndicha ñuhu Nyoo, ta chihin cha cahnu cuví ra.

²⁷ Tyicuan ta cutachi chi ángel ta cusandu ñn ri chi ñu nacachi ñicahnu siqui ñuhu ñayiví, nyacua

nya nu ndihí ñuhu ñayiví ta nyacua nya nu ndihí andiví.

²⁸ Cutuñi iñi ndo cuhva tu higo ihya: Tatu nduyutya soco tun ta caña numa tun cha chitó ndo vatyi cha cuñí chaa quiví coo chiti, cha vachi vico savi.

²⁹ Ta suri tyicuan caa tatu cha nyehe ndo tuhun ihya, coto ndo tyi cha nyañaa yatyin quiví quichi tiqui. Cha nyañai yuvehe cuví cuan.

³⁰ Cha ndicha catyí chi ndo vatyi tandihí ihya cucuvi cha ni ri ca cha iyó ñáyiví.

³¹ Tyicuan ta cunaa andiví ta ñuhu ñayiví cha iyó cha vityin. Soco tuhun cahín tyicuan ri cucuvi tari cuhva catyí.

³² Soco yori chitó ñáá quiví ta ñáá cuhva cucuvi tandihí ihya, ni ángel Nyoo, ni yuhu Sehe Nyoo. Noo tuhun ri maa Nyoo Suti cuví ra chitó.

³³ Yucuan chaha conyito vaha ndo, ta saha ndo cuenda ta çacan tahvi ndo, vatyi ña chitó ndo ñáá quiví cuchaa cuhva.

³⁴ Tari noo ra cha cua cuhun nu cañi. Ta cha ni cumañi ca cuhun ra, chaha cuenda ra vehe ra chi musu ra. Ta chaha ra tyiño chi noo noo ra. Ta tachí ra chi ra sahá cumi yuvehe cuan na saha ra cuenda.

³⁵ Yucuan chaha nyoho conyito ndo vatyi ña chitó ndo ñáá cuhva cuquichi ra cha cuví tari chitoho vehe cuan, an cha ni cua cuaa, an ñuu, an cuhva cha chacú chaa loho, an cha ñaha ri.

³⁶ Conyito ndo coto sana iñi ndo ta quichi ra, ta nañihi ra chi ndo quixí ndo.

³⁷ Cha catyí chi nyoho, catyí tiqui chi tandihí ñáyiví ñandihí. Na conyito ñu.

14

*Nu canducú ra cuhva catiin ra chi ra Jesús
(Mt. 26.1-5; Lc. 22.1-2; Jn. 11.45-53)*

¹ Uvi ca quivi cumañi ta cua tahan chi vico cha nañi pascua ta vico cha tuhva ñu chachí ñu pan cha ñahri yuchan iya yihí. Ta ra cacuví nuu chi tata sutu ta ra casacuahá cuenda ley vehe ñuhu canducú ra cuhva catiin xehe ra chi ra Jesús ta cacahñi ra chi ra.

² Soco cacatyí ra chi ra tahan ra:

—Ma tiin yo chi ra cha chichi vico vityin coto naquiqui ñáyivi —cacatyí ra.

*Nu choso noo ñaha sihi ndutya vixi chahán chi ra Jesús
(Mt. 26.6-13; Jn. 12.1-8)*

³ Ñohó ra Jesús ñuu Betania vehe ra Simón, cha catyí ñu: “Simón ra cha tyahyu coño.” Ta cha ni ri ca cha nyaá ra mesa, chaḡ noo ñaha sihi ndaha ña noo yutyi cha chinḡ chihin noo yuu cha nañi alabastro. Tyitu yihí chihin ndutya vixi chahán cha nañi nardo. Ta yahvi vavaha nyaá. Ta tahvi ña yutyi cuan ta choso ña ndutya vixi chahán cuan xiñi ra Jesús.

⁴ Soco suhva ra canyicú yucuan cacuxaan ra ta cacatyí ra chi tahan ra:

—¿Ñáá tuhun sativi ña ndutya vixi chahán cuan?

⁵ Tyehe ta quiyahvi cuan, cuenda mil cuñihi yo chihin chi, ta tyinyee chi chi ñu ndahvi —catyí ra.

Ta caḡan ra chi ña.

⁶ Soco ra Jesús catyi ra:

—¡Saña ndo chi ña! ¿Ñáá tuhun cha sayangá ndo chi ña? Cha choso ña chii tyehe caa, cha vaha cuví.

⁷ Vatyí ñu ndahvi tyicuan ri cua cunyaa ñu chihin ndo, ta cuví sacuvi maa ndo cha vaha chihin ñu ñáá ri quívi cuñí ndo. Soco yuhu ñima tyicuan ri cua cunyai chihin ndo.

⁸ Ñaha sihi ihya sacuvi ña yoso cuhva cha cuví chi ña. Choso ña ndutya vixi chahán coño ñuhi, cha ni cumañi ca cucúvi ta quíhvi chichi ñuhu.

⁹ Cha ndicha catyí chi ndo, vatyí tandíhi ri nicahnu ñuhu ñayívi nu cahan ñu tuhun Nyoo, cunacatyí tucu ñu tuhun cha sacuvi ñaha ihya, tacuhva nichon iñi ñáyívi tuhun ña —catyí ra Jesús.

Nu nacuhva cuenda ra Judas chi ra Jesús chi ra xaan iñi chi ra
(Mt. 26.14-16; Lc. 22.3-6)

¹⁰ Yahá cuan ta ra Judas Iscariote, noo ra chichi cha uchi uvi tahan ra cachicá noo chihin ra Jesús, chahan ra chindatuhun ra chihin ra cacuví nuu chi tata sutu, vatyí casandaa ra noo tyiño ta nacuhva cuenda ra chi ra Jesús chichi ndaha ra.

¹¹ Cuhva cha cachiñi ra ihya, cusii xaan cacuñí ra, ta catyí ra vatyí cuhva ra xuhun chi ra. Tyicuan ta quichahá nducu ra Judas cuhva nacuhva cuenda ra chi ra Jesús.

Nu cuxiñi ra Jesús chihin ra cachicá noo chihin ra
(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Cuví chi quívi quichaha vico cha chachí ñu pan cha ñahri yuchan iya yihí. Yucuan quívi cha

vico pascua tuhvá ñu chahñi ñu mbee luhlu cha chahá ñu chi Nyoo. Ta ra cachicá noo chihin ra Jesús candacā tuhun ra chi ra, ta cacatyí ra:

—¿Nya maa maa cuñún cha sanduvaha ndi cha cuxiñun cha vico ihya?

¹³ Tyicuan ta tach̄i ra chi uvi tahan ra ta catyí ra chi ra:

—Cuahan ndo chichi ñuu, ta yucuan cunañihi ndo chi noo ra cha nyisó noo quiyi ndutya. Cuahan ndo chata ra.

¹⁴ Ta nu quihvi ra, catyi ndo chi ra cuví chitoho vehe yucuan tyehe caa: “Ra Sacuaha cuñí ra coto ra nya nyaá cuarto nu cusanducahnu ra vico chihin ra cachicá noo chihin ra”, catyi ndo chi ra.

¹⁵ Ta maa ra cusañaha ra noo cuarto cahnu nu piso sucun chi ndo. Cha yah̄a nduvi, ta yucuan cusanduvaha ndo cha cuxiñi yo —catyí ra Jesús chi ra.

¹⁶ Cuahan coyo ra. Ta chāa coyo ra chichi ñuu. Canañihi ra tari cuhva catyi ra Jesús chi ra, ta casanduvah̄a ra cha cuxiñi ra cha vico pascua cuan.

¹⁷ Ta cha cuaa cuan chāa ra Jesús chihin ndi uchi uvi ra chicá noo chihin ra.

¹⁸ Ta cuhva cha canyicú ra nu mesa cachachí ra, ra Jesús catyí ra:

—Cha ndicha catyí chi ndo vatyi noo nyoho cha chachí ndo chihin cunaxico tuhun ndo chii.

¹⁹ Tyicuan ta canducuihȳa iñi ra ta quichaha candacā tuhun tahan tahan ri ra chi ra, ta cacatyí ra:

—¿Atu yuhu?

²⁰ Ta nacahan ra Jesús ta catyí ra:

—Noo ra chichi cha uchi uvi ndo. Ra cha satyii pan ñin ri nu coho chihin, ican ra cuan cuví.

²¹ Vatyí yuhu Rayii cha quichí nya gloria cucuvi chii tari cuhva catyí nu tutu tuhun Nyoo. Soco jndahvi ra ndahvi ra naxicó tuhun chii! Vaha taxin ca cha cuenda ra, tyehe ta ña cacu ra —catyí ra Jesús.

²² Cha ni ri ca cha cachachí ra, ra Jesús quehen ra pan ta nacuhva ra tyahvi nyoo chi Nyoo. Ta tahvi ra ta chaha ra chi tandihí ca ra, ta catyí ra:

—Quehen ndo. Ican ihya cuví coñe —catyí ra chi ra.

²³ Yaha cuan ta quehen ra vaso vinu. Ta cha yaha cha nacuhva ra tyahvi nyoo chi Nyoo, chaha ra chi ra. Ta tandihí ra cachihí ra cha ñohó chichi vaso cuan.

²⁴ Ta catyí ra chi ra:

—Vinu cha yihí chichi vasu ihya tari ñiñi cuví. Ta chihin ñiñi tyihí tahan Nyoo tuhun chaa chihin ndo vatyí cucati cha cuenda cha vaha chi cuaha ñáyivi.

²⁵ Cha ndicha catyí chi ndo vatyí ma coho que vinu nyacua nya quivi nachai nu nyacá ñaha Nyoo ta cohi vinu chaa —catyí ra Jesús chi ra.

Nu catyí ra Jesús tyi cucatyí ra Pedro tyi ña ñohó nuu ra chi ra (Mt. 26.30-35; Lc. 22.31-34; Jn. 13.36-38)

²⁶ Cha yaha cha cachita ra yaa, ta caquita ra cuahan coyo ra nya yucu yutun Olivo.

²⁷ Tyicuan ta catyí ra chi tandihí ra:

—Tandihí nyoho cusandoo notuhun maa ndo chii vityin cha cuaa. Vatyí catyí chi nu tutu tuhun

Nyoo tyehe caa: “Cucahñi chi ra sahá cumi mbee, ta mbee cacacono ti ityi cuan ityi ihya”, catyí chi.

²⁸ Soco cha yaha cha nandote, xihna que cuhun ityi Galilea ican saha nyoho —catyí ra Jesús chi ra.

²⁹ Tyicuan ta quichaha catyí ra Pedro chi ra:

—Vasi tandihi ra sandoo ra chuun, soco yuhu ma sandoi chuun —catyí ra chi ra Jesús.

³⁰ Soco ra Jesús catyí ra chi ra:

—Cha ndicha catyí chuun, vatyí suri maa cha cuaa ihya, cha ni cumañi ca cuacu loho uvi chaha, yoho cucatyun tyi ña ñohó nuun chii uñi chaha —catyí ra Jesús chi ra Pedro.

³¹ Soco saniñi ra Pedro ta catyí ra:

—Vasi cúvi chuhun, soco ma tixehi cha ñohó nui chuun —catyí ra Pedro.

Ta tandihi ra cacatyí ra tyicuan caa.

*Nu chican tahvi ra Jesús nu cuví Getsemaní
(Mt. 26.36-46; Lc. 22.39-46)*

³² Tyicuan ta cachaꞗ coyo ra noo nu nañi Getsemaní. Ta ra Jesús catyí ra chi ra cachicá noo chihin ra:

—Cunyicu ndo ihya ni ri cuhin cucacan tahvi —catyí ra Jesús.

³³ Ta quehen ra chi ra Pedro, ta ra Jacobo ta ra Juan cuahan chihin ra. Ta quichahaꞗ chica xaan iñi ra ta cutyoño cuñi ra.

³⁴ Ta catyí ra chi ra:

—Tuví iñi añime noo tucuihya iñi, ta cuñi cahñi chi chii. Ndoꞗ nyoho ihya, ta conyito ndo —catyí ra.

³⁵ Tyicuan ta cuahan ra chiin ca ityi nuu ca. Ta chicuiñi chiti ra nu ñuhú. Ta chican ra chi Nyoo

tatu cuvi cha ma nyehe ra t̄ndoho cha cua cuvi
chi ra cuhva cuan, catyí ra chicán tahvi ra.

³⁶ Ta nu chicán tahvi ra, ta catyí ra:

—Sutu Mañi yuhu, cha cuenda yoho ñahri cha
ma cuvi chuun. Tu yoho ta cuñún na canyaha
t̄ndoho ihya chii. Soco ma cuvi tari cuhva cha
cuñí mai, soco cuhva cha cuñí maun na cuvi
—catyí ra Jesús chicán tahvi ra.

³⁷ Yahā cuan ta nachaa ra nu nyicú ra. Ta nyehe
ra tyi caquixí ra. Ta catyí ra chi ra Pedro:

—Yoho Simón, ¿atu quixún? ¿Atu ña cuvi
conyiton ni noo hora?

³⁸ Conyito ndo ta caçan tahvi ndo tacuhva cha
ma sanacava ra ña vaha chi ndo nu cuatyí. Cha
ndicha, cuñí aña ndo sacuvi ndo cha vaha, soco
coño ñuhu ndo vita xaan cuñí chi —catyí ra Jesús
chi ra.

³⁹ Tyicuan ta cuahan ra inga chaha. Ta chicān
tahvi ra suri maa cha chicān ra cha xihna ri.

⁴⁰ Tyicuan ta nachaa tucu ra inga chaha, nyehe
ra tyi caquixí ra. Vatyí nicunyasi maa chiti nuu ra
chihin cha cacuñí xaan ra cusu ra. Ta ña cachitó
ra ñáá cha nacahan ra chihin ra Jesús.

⁴¹ Ta chahan ra cha cu uñi chaha, ta nachaa ra,
ta catyí ra:

—Vityin ndicha cusu ndo, nyitatu ndo. Cha iyó
vaha ri vityin, cha chaā cuhva cha cucuhva
cuenda ra chi yuhu Rayñi cha quichi nya gloria
ndaha ra ca iyó cuatyí.

⁴² Ndicuita ndo, coho ndo. Cha vachi ra naxicó
tuhun chii —catyí ra Jesús chi ra.

Nu catín ra chi ra Jesús

(Mt. 26.47-56; Lc. 22.47-53; Jn. 18.2-11)

⁴³ Ni cahán ca ra Jesús ta chaḡ ri ra Judas, noo ra chichi cha uchi uvi tahan ra chícá noo chihin ra. Ta cuaha sindaro ta policía vachi coyo chihin ra canyisó ra mityi ta yutun. Vachi coyo ra cuenda ra cacuví nuu chi tata sutu, ta ra casacuaha cuenda ley vehe ñuhu, ta cuenda ra mandoñi.

⁴⁴ Cha ni cumañi ca cachaa coyo ra, ra Judas, ra cha naxicó tuhun chi ra, chahḡ ra noo seña chi ra ta catyí ra:

—Ra cha tyayuhi, ican ra cuan cuví. Tḡn vaha ndo chi ra na cuhun ra chihin ndo.

⁴⁵ Ta cuhva cha chaḡ ra tuhva ra nu nyaá ra Jesús ta catyí ra chi ra:

—Maestro.

Ta tyayuhḡ ra xitín ra.

⁴⁶ Tyicuan ta catḡn ra chi ra Jesús ta cuahan ra vehe caa.

⁴⁷ Soco noo ra cha nyaá yucuan tava ra mityi ra ta chahnya ra soho musu ra cuví nuu chi tata sutu.

⁴⁸ Tyicuan ta ra Jesús catyí ra chi ra cachaa coyo cuan:

—¿Atu vachi tḡn ndo chii chihin mityi ta chihin yutun, tari cha vatyi cuví yuhu noo ra suhu?

⁴⁹ Ndi quiví chinyaḡ chihin ndo sañahí chichi vehe ñuhu cahnu cuan. Ta ni noo chaha ña tḡn ndo chii. Soco cuví chi tyehe caa vityin, tacuhva chino cava tari cuhva catyí nu tutu tuhun Nyoo —catyí ra Jesús chi ra.

⁵⁰ Tyicuan ta tandihí ra cachicá noo chihin ra, cachinḡ ra ta casandoḡ noo tuhun maa ra chi ra Jesús.

⁵¹ Soco noo ri ca ra tyivaa nyicón ra chi ra, ndichí ra noo sinduhu ta catḡn tucu ra chi ra.

52 Soco sandoꝝ ra s̄nduhu cuan ta cuahan vavaha ra vityiaa vityi cañi ra.

Nu cutuñi chi ra Jesús nuu ra cuví tyiño (Mt. 26.57-68; Lc. 22.54-55, 63-71; Jn. 18.12-14, 19-24)

53 Tyicuan ta cachinyac̄a ra chi ra Jesús nuu ra cuví nuu chi tata sutu, ta candu īn ri tandihi ra chihin ra cacuví mandoñi, ta ra casacuahá cuenda ley vehe ñuhu.

54 Ta ra Pedro cuahan ra chata ra nya sava ri, nyacua nya nuquehe vehe ra cuví nuu chi tata sutu cuan. Ta ndoꝝ ra nyaá ra chihin policia sanasaá ra chi ra yatyin yunuhu.

55 Ra cacuví nuu chi tata sutu, ta tandihi ra cuví tyiño canducu ra ñáá noo cuatyí tyaa ra siqui ra Jesús, tacuhva cuvi cacahñi ra chi ra soco ña cañih̄i maa ra.

56 Vasi cuaha ñáyiv̄i cah̄an ñu cuendu siqui ra, soco ña nacachí tahan tuhun cah̄an ñu.

57 Yihi ñu candicuit̄a ñu ta catyaā ri maa ñu cuendu siqui ra, ta cacatyí ñu:

58 —Nyuhu chiñi ndi cha cah̄an ra vatyí cusatani ra vehe ñuhu cahnu cha savaha ñáyiv̄i. Ta chichi cha uñi quiv̄i cunacananayaa ra inga vehe ñuhu cha ñima ñáyiv̄i savaha, na —catyí ñu.

59 Soco ni tyicuan caa ña nacach̄i tahan cha catyí ñu.

60 Tyicuan ta ra cuví nuu chi tata sutu ndicuita ra mahñu nu nyicú tandihi ra yucuan, ta quichah̄a ndaca tuhun ra chi ra Jesús, ta catyí ra:

—¿Atu ña nacahan maun? ¿Ñáá cha cuví ihya cha cacahán ra sicun? —catyí ra chi ra.

⁶¹ Soco ra Jesús taxi ri nanyaá ra, ta ña nacahan maa ra. Ta ra cuví nuu chi tata sutu cuan ndaca tuhun ra chi ra inga chaha, ta catyí ra:

—¿Atu yoho cuvún Cristo, Sehe Nyoo ra cha iyó cha vaha chi?

⁶² Ra Jesús catyí ra chi ra:

—Ican, yuhu cuví. Ta nyoho cunyehe ndo chi yuhu Ray#i cha quichi nya gloria, cucunyai chiyo vaha Nyoo ra cha iyó tandi#i tunyee iñi chi. Ta cunyehe ndo chii quiv#i quichi nu vico andiv#i —catyí ra chi ra.

⁶³ Tyicuan ta ra cuví nuu chi tata sutu cuan, chahnya ra sahma ra tari noo seña vatyí ña tahán iñi ra, ta catyí ra:

—¿Ñáá ca cha ndaa cuñí yo?

⁶⁴ Nyoho cha chiñi ndo vatyí chicoo cuatyí ra nuu Nyoo chihin tuhun cahán ra. ¿Yoso caa cuñí nyoho? —catyí ra.

Ta tandi#i ra cacatyí ra vatyí tahán chi cúvi ra.

⁶⁵ Tyicuan ta suhva ra quichaha tyicu s#i ra chi ra. Ta chasi ra nuu ra, ta cañi ra chi ra chihin chiqui ra ta cacatyí ra chi ra:

—¡Nacoto yóo cha cañi chuun! —cacatyí ra chi ra.

Ta policía cacatu ra nuu ra.

Nu catyí ra Pedro vatyí ña ñohó nuu ra chi ra Jesús (Mt. 26.69-75; Lc. 22.56-62; Jn. 18.15-18, 25-27)

⁶⁶ Ra Pedro nyaá ra ityi yuvi nuquehe. Tyicuan ta chaá noo ñaha sahá tyiño chihin ra cuví nuu chi tata sutu cuan.

⁶⁷ Ta cuhva cha nanyehe ña chi ra Pedro vatyí sanasaá ra chi ra yunuhu cuan, ndoo ña nyehé vavaha ña chi ra, ta catyí ña chi ra:

—Yoho ñandihí, chica noun chihin ra Jesús ra ñuu Nazaret cuan —catyí ña chi ra.

⁶⁸ Soco ra Pedro tixehe ra, ta catyí ra:

—Ña ñohó nui chi ra, ña chité ñáá tuhun cahún —catyí ra chi ña.

Tyicuan ta quita ra ityi yuvehe. Tyicuan ta chacu noo loho.

⁶⁹ Tyicuan ta ñaha cha nyaá tyiño yoo cuan, nanyehe tucu ña chi ra inga chaha ta quichaha catyi ña chi ra canyicú yucuan:

—Noo ra tahan ra cuan cuví ra ihya —catyí ña.

⁷⁰ Soco tixehe ra inga chaha. Ta yaha suhva ri ca cuhva ta ra canyicú yucuan cacatyí tucu ra inga chaha chi ra Pedro:

—Cha ndicha vatyí noo ra yucuan cuví yoho, vatyí ra Galilea cuvún, vatyí tari cahán ñu, cahún —catyí ra chi ra.

⁷¹ Tyicuan ta iyo xaan tyanaha ra Pedro, ta catyí ra:

—¡Chitó vaha Nyoo tyi ña ñohó nui chi ra cha cahán nyoho tuhun! ¡Na cahñi Nyoo chii tatu ña ndicha cha cahín! —catyí ra.

⁷² Ta caa cuhva ri cuan chacu ri loho cha cu uvi chaha. Tyicuan ta ñicohon iñi ra Pedro tuhun cha cahán ra Jesús chihin ra: “Cha ni cumañi ca cuacu loho uvi chaha, yoho cucatyun vatyí ña ñohó nuun chi yuhu uñi tahan chaha.” Ñicohon iñi ra Pedro ta quichaha chacu chaa ra.

15

*Nu nanyaa ra Jesús nuu ra Pilato
(Mt. 27.1-2, 11-14; Lc. 23.1-5; Jn. 18.28-38)*

¹ Cuhva cha cundichin candu ñn ri ra cacuví nuu chi tata sutu chihin ra cacuví mandoñi ta chihin ra casacuahá cuenda ley vehe ñuhu ta tandihí ra cuví tyiño ñu Israel. Ta ra Jesús nuhñí ra, chinacuhva cuenda ra chi ra chi ra Pilato.

² Ta ndaca tuhun ra Pilato chi ra, ta catyí ra:

—¿Atu rey cuenda ñu Israel cuví yoho?

Ta nacahan ra Jesús ta catyí ra:

—Ican, yuhu cuvi. Ndicha cha cahún.

³ Ta ra cacuví nuu chi tata sutu cuaha xaan cha catyaa ra siqui ra.

⁴ Tyicuan ta quichaha ndaca tuhun tucu ra Pilato inga chaha chi ra, ta catyí ra:

—¿Atu ña nacahan maun? Nyehe yoso cha cuaha cha tyaá ra sicun.

⁵ Soco ra Jesús ña nacahan maa ra. Yucuan chaha ña chitó ra Pilato ñáá cha caca xiñi ra.

*Nu cutuñí chi ra Jesús vatyí cucúvi ra
(Mt. 27.15-31; Lc. 23.13-25; Jn. 18.38—19.16)*

⁶ Ta vico cuan tuhvá ra Pilato saña ra chi noo ra ñohó vehe caa, noo ra cha cacan maa ñáyivi.

⁷ Ta ñohó noo ra nañí Barrabás vehe caa cuan, ñn ri chihin inga ra cha cachahñi chi ñáyivi noo nu naquiqui ñáyivi siqui gobiernu.

⁸ Ta quichí coyo ñáyivi quichaha chican ñu chi ra Pilato na saña ra chi noo ra tari tuhvá maa ra.

⁹ Ta nacahan ra Pilato, ta catyí ra:

—¿Atu cuñí nyoho cha sañe chi Rey cuenda ñu Israel?

¹⁰ Tyicuan caa catyi ra vatyí tuví ñni ra vatyí ra cacuví nuu chi tata sutu cuan tasi cuñí ra chi ra Jesús tyi cuaha ñáyivi nyicón chi ra, yucuan chaha nacuhva cuenda ra chi ra.

11 Soco ra cacuví nuu chi tata sutu cuan catiyuhū ra chi ñáyiví na catyí ñu na saña ra chi ra Barrabás.

12 Tyicuan ta ndacā tuhun ra Pilato chi ñu, ta catyí ra:

—¿Ta ñáá cha cuñí ndo sacuvi chihin ra cha catyí nyoho Rey cuenda ñu Israel chí? —catyí ra chí ñu.

13 Tyicuan ta nacanachaā ñu, ta catyí ñu:

—¡Na cúvi ra nu cruzi! —catyí ñu, canachaá ñu.

14 Ta catyí ra Pilato chí ñu:

—Soco ¿ñáá cha ña vaha sacuví ra? —catyí ra.

Soco canachaā ca ñu ta catyí ñu:

—¡Na cúvi ra nu cruzi! —catyí ñu.

15 Tyicuan ta vatyí cuñí ra Pilato cuvaha ra nuu ñu, saña ra chí ra Barrabás. Tyicuan ta tyihí ra tyiño na ndoho ra Jesús, ta cha yaha cuan chahā cuenda ra chí ra vatyí cúvi ra nu cruzi.

16 Tyicuan ta chinyacā sindaro chí ra nuquehe vehe tyiño cuan. Ta casandu ñn ri ra tandihí sindaro.

17 Ta casacuihnō ra noo sahma tyacu nyaa chí ra. Ta caquicu ra noo corona chihin iñu. Ta catyihí ra xiñi ra.

18 Yahā cuan ta quichaha cacana chaa ra siqui ra chacú nyaa ra chí ra, ta catyí ra:

—¡Nocumi chuun, yoho Rey cuenda ñu Israel! —catyí ra.

19 Ta cacañi ra xiñi ra chihin noo yutun, ta tyicú si ra chí ra. Ta cachicuiñi chíti ra casaha ra tyi sacahnu ra chí ra.

20 Cha yahā cha chacu nyaa ra chí ra tyicuan caa, tinyaā ra sahma nyaa cuan chí ra, ta sandihví

noo ra sahma maa ra chi ra. Yahá cuan ta cuahan ra chihin ra vatyi cuatyaa ra chi ra nu cruzi.

Nu cuacúvi ra Jesús nu cruzi

(Mt. 27.32-44; Lc. 23.26-43; Jn. 19.17-27)

²¹ Yahá noo ra ñuu Cirene, nañí ra Simón. Sutu ra Alejandro ta ra Rufo cuví chi ra. Ni cua nachaa ra cha chahan ra nu chiqui. Ta cuhva cha cua yaha ra ityi cuan, casaniñi sindaro chi ra na cuiso ra cruzi ra Jesús.

²² Ta cachinyaca ra chi ra Jesús noo nu nañí Gólgota. Ta cuñi chi catyi: Nu Cuví Yiqui Xiñi Ndiyí.

²³ Ta cachaha ra vinu nasaca chihin noo tatan cha nañi mirra coho ra. Soco ra Jesús ña chihí ra.

²⁴ Cha yaha catyaa sindaro chi ra nu cruzi, cachahan ra sihva chihin sahma ra ta nya ra saha ganaa caquehen ra sahma ra.

²⁵ Caa ñn cha ñaha ri catyaa ra chi ra nu cruzi.

²⁶ Ta letra cha catyaa ra xiñi cruzi cuan, catyi chi ñáá cuatyí ra. Ta catyi chi tyehe caa: “Ican ra ihya cuví Rey cuenda ñu ñuu Israel.”

²⁷ Ta chinanya ra uvi ca cruzi nu chitaca ra uvi tahan ra suhu, noo ra chiyo vaha ra, ta inga ra chiyo satyin ra.

²⁸ Ta tyícuan caa quitá chi tari cuhva catyi nu tutu tuhun Nyoo tyehe caa: “Sahá ñu tuhun tyi cuví ra noo ra quiñi iyó.”

²⁹ Ta ñu yahá coyo chacú nyaa ñu chi ra. Ta quisí xiñi ñu, ta catyi ñu chi ra:

—¡Jaan! ¡Yoho cha catyün tyi cusatanun vehe ñuhu cahnu, ta chichi cha uñi quiñi cunacoñehun inga chaha!

³⁰ ¡Sacacu maun chuun ta noo nu cruzi chiña!
—catyí ñu.

³¹ Ta tyicuan caa tucu ra cacuví nuu chi tata
sutu ta ra casacuahá cuenda ley vehe ñuhu,
cachacú nyaa ra chi ra, ta catyí ra chi tahan ra:

—¡Chi inga ñu sacacu ra, soco ña cuví sacacu ra
chi maa ra!

³² Na noo ra nu cruzi vityin, na nyehe yo ta
chino iñi yo tyi Cristo Rey cuenda ñu Israel cuví
ra —catyí ra.

Ta nyacua nya ra tacaá inga cruzi inchiyo
inchiyo xiin ra ta cacahán ra chi ra.

Nu chihí ra Jesús

(Mt. 27.45-56; Lc. 23.44-49; Jn. 19.28-30)

³³ Cuhva cha cua cu hora, tandihí ñuhu ñayiví
nduñaa, nyacua nya caa uñi cha cha iñi.

³⁴ Ta suri kuhva cuan canachaa ra Jesús chihin
tandihí fuerza ra, ta catyí ra:

—Eloi, Eloi, ¿lama sabactani? —ta cuñí chi catyí:
Nyoo Suti, Nyoo Suti, ¿ñáá tuhun sandoo noo
tuhun maun chii? —catyí ra.

³⁵ Suhva ra tayucu yucuan cachiñí ra ta catyí
ra:

—¡Xihna! Caná chaa ra chi ra profeta Elías
—catyí ra.

³⁶ Tyicuan ta chinó noo ra yucuan chiquehen
ra noo tari caa xixan ta satyí ra chihin vinu iya.
Ta tyaa ra noo nu yutun ta satuhva ra yuhu ra na
coho ra, ta catyí ra:

—Cuatu ndo. Na nyehe yo tatu quichi ra Elías
sanoo ra chi ra —catyí ra cuan.

³⁷ Tyicuan ta ñihi xaan canachaa ra Jesús, ta
chihí ra.

38 Ta sahma cha tacaá chichi vehe ñuhu cahnu ndata sava maa chi, nya siqui ta nyacua nya ityi yuvi.

39 Ta noo capitán cuenda sindaro Roma nanyaá ra yatyin nuu ra Jesús cuan. Cha nyehe ra yoso caa cana cha ra, ta yoso caa chihí ra, ta catyí ra:

—Cha ndicha ndicha cuii vatyí Sehe Nyoo cuví chi ra ihya —catyí ra.

40 Ta nya sava ri tayucú tucu suhva ñusihí canyehé ñu. Ta mahñu ñu cuan nanyaá cu María ñaha Magdala, ta cu María sihi ra José ta ra Jacobo ra tyivaa ca. Ta nanyaá tucu cu Salomé.

41 Ican ñusihí ihya cachinyicon chi ra Jesús, ta tyinyeé ñu chi ra quivi chica noo ra ityi Galilea. Ta sin ri nyicú cuaha ca ñu cha chaá coyo chihin ra Jerusalén cuan.

Nu chicuchí ñu chi ra Jesús

(Mt. 27.57-61; Lc. 23.50-56; Jn. 19.38-42)

42 Cuví chi quivi cha sanduvaha ñu cha cachi ñu vatyí inga quivi tuhvá ñu nyitatu.

43 Ta cha cuaa cuan chaá ra José ra ñuu Arimatea. Noo ra cuví tyiño. Nyatú tucu maa ra nu cunyaca ñaha Nyoo. Ta ndachan cuñí ra ta quihví ra nu nyaá ra Pilato, ta chican ra coño ñuhu ra Jesús chi ra.

44 Iyo cuñí ra Pilato cha nacoto ra vatyí cha chihí ra Jesús. Ta cana ra chi capitán vatyí ndaca tuhun ra tatu cha yaha chihí ra.

45 Ta cha catyí capitán vatyí cha yaha chihí ra, ra Pilato chaha ra coño ñuhu ra chi ra José.

46 Tyicuan ta sata ra José noo sinduhu cha chinó chihin sahma finu cha nañi lino, ta sanoo

ra coño ñuhu ra. Ta siqu_i noo ra chihin sinduhu cuan. Yah_a cuan ta chityih_i ra chi ra noo chichi ñaña cha cachaty_a ra chichi noo yuu. Ta chasi_r ra yuhu ñaña cuan chihin noo yuu cahnu.

⁴⁷ Ta cu María ñaha Magdala cuan ta cu María sihi ra José, cha_a coyo ñu nyehe ñu nu tyih_i ra chi ra.

16

Nu nandoto ra Jesús

(Mt. 28.1-10; Lc. 24.1-12; Jn. 20.1-10)

¹ Yah_a quiv_i nyitatu_i ñu. Tyicuan ta cu María ñaha Magdala ta cu María sihi ra Jacobo, ta cu Salomé sata_r ñu ndutya vixi chahán ta cuahan coyo ñu cua tyih_i ñu coño ñuhu ra Jesús.

² Ta timingu cuv_i, quiv_i quichaha vitya, ñaha cuii ri cuhva cha vachi cundichin cuhva cha ni cua caña ñanyii, cha_a coyo ñu nu ñaña.

³ Ta caty_i ñu chi tahan ñu:

—¿Yóó cha cusacanyaha yuu yuhu ñaña cuan?
—caty_i ñu chi tahan ñu.

⁴ Soco cuhva cha nanyehe_r ñu, yuu cahnu cha nyasi_r yuhu ñaña cuan cha cuachiyo_r chi nya sava.

⁵ Quihv_i coyo ñu chichi ñaña yucuan. Ta nanyehe_r ñu chi noo ángel tari caa noo ra tyivaa, nyaá ra chiyo vaha. Ta ñihnó ra sahma cañi ta cuichin. Ta canayuhv_i ñu.

⁶ Soco caty_i ra chi ñu:

—Ma yuhvi ndo. Nyoho nanducú ndo chi ra Jesús ra ñuu Nazaret, ra cha chih_i nu cruzi. Soco cha nandoto_r ra. Ña ñohó ca ra ihya. Nyehe ndo nu chacu_n ra chi ra.

⁷ Cuahan ndo cua sacoto ndo chi ra Pedro ta chi inga ra cachica noo chihin ra. Catyi ndo chi ra vaty na cuhun coyo ra ityi Galilea vaty yucuan nyatú ra Jesús chi ra, tari cuhva catyi ra chi ra. Vaty ra Jesús cha cuahan ra ityi nuu —tyicuan caa catyi ángel cuan chi ñu.

⁸ Tyicuan ta cuahan coyo vavaha ñu, vaty suri canihí ñu cha cuenda cha yuhví ñu. Ta yori maa chihin cahán ñu tuhun cha cuenda cha yuhví ñu.

*Nu tuvı ra Jesús nuu cu María ñaha Magdala
(Jn. 20.11-18)*

⁹ Cuvı chi timingu quıvi quichaha vitya cha nandoto ra Jesús. Yahā cuan ta xihna ca nuu cu María ñaha Magdala tuvı ra. Maa ña cuvı ñaha cha tava ñehe ra ucha tahan taty ña vaha.

¹⁰ Ta chahan ña chisacoto ña chi ra cachica noo chihin ra, vaty canyicú cuihya ra ta cachacú cha ra.

¹¹ Soco cuhva cha cachiñi ra vaty iyó ra Jesús ta vaty nyehe ña chi ra, ña cachino iñi ra.

*Nu tuvı ra Jesús nuu uvi tahan ra chicā noo chihin
ra
(Lc. 24.13-35)*

¹² Cha yahā cuan, ra Jesús tuvı ra nuu uvi tahan ra cha cuahan coyo chica ityi ityi nu chiqui. Soco siin caa cuhva caá ra cananyehe ra chi ra.

¹³ Ta cuanuhu coyo ra ta sacoto ra chi tandihı ca ra. Soco suri ña cachino iñi ra cha cacahan ra cuan.

*Tuhun cha chahā ra Jesús chi ra cha tyatyñō ra chi
(Mt. 28.16-20; Lc. 24.36-49; Jn. 20.19-23)*

14 Ta cuee ca ta tuv̄i ra Jesús nuu ndi uchi ñn ra cha cachic̄a noo chih̄in ra, cha ñi ri ca cha canyicú ra nu mesa. Ta caḥan ra chi ra cha cuenda cha ña cachinó ñni ra, ta cha cuenda cha candava añima ra vatyí ña cachin̄o ñni ra tuhun caḥan ñu nyeh̄e tyi nandot̄o ra.

15 Ta catyí ra chi ra:

—Cuḥan ndo nicacahnu ñuhu ñayiv̄i, ta caḥan ndo chih̄in tandih̄i ñáyiv̄i, ta catyí ndo chi ñu yoso caa sacacú Nyoo añima ñu.

16 Ta ñu cha chinó ñni ta condutya ñu, cucacu añima ñu. Soco ñu cha ña chinó ñni cundoo cuatyí ñu siqui ñu ta cunaa ñu.

17 Ta tandih̄i seña ihya cusacuvi ñu cha chinó ñni chii: Chih̄in sivi cutava ñehe ñu tatyí ña vaha. Cucahan ñu inga sahan cha ña chitó ñu.

18 Cutiñ ñu coo, ta tatu coho ñu cha yih̄í venenu, ma saha cuehe chi ñu. Ta siñ ri cutyiso ñu ndaha ñu siqui ñu cuhv̄í, ta cunduvaha ñu.

Nu nandaq̄ xica ra Jesús andiv̄i (Lc. 24.50-53)

19 Nu ndih̄i caḥan Sutu Mañi yo Jesús chih̄in ra, ta nandaq̄ xica ra andiv̄i, ta chicunyaq̄ ra chiyo vaha Nyoo.

20 Tyicuan ta ra cachic̄a noo chih̄in ra quit̄a ra ta chah̄an coyo ra chicah̄an ra tuhun Nyoo yoso caa sacacú ra añima yo tandih̄i ri ityi. Suri maa Sutu Mañi yo tyinyee chi ra vatyí chah̄a ra cha sacuvi ra cuaha milagru. Ta tyicuan caa nyeh̄é ñáyiv̄i tyi ndicha tuhun cacah̄an ra.

Tuhun cha sañahá ra Jesucristo chi yo
New Testament in Mixtec, Jamiltepec
(MX:mxt:Mixtec, Jamiltepec)

copyright © 1983 Wycliffe Bible Translators, Inc.

Language: Mixtec, Jamiltepec

Translation by: Wycliffe Bible Translators, Inc.

Mixteco, Jamiltepec [mxt], Mexico

Copyright Information

© 1983, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Jamiltepec

© 1983, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Mar 2026 from source
files dated 29 Jan 2022
7411d349-0f34-5963-987e-74457a7bad38